

# KORINT DILAG NAI 1 PAULUS YOM

## *PAULUS NUG KAYAKNU ENA HEME AUM*

<sup>1</sup> Da Paulus, Kayak Nug da onilpa eum, da Kayak oo niite bia Kristus Jesusnu total danab daate<sub>m</sub>, da amu ig lainig Sostenis ele <sup>2</sup> i nai imu ad u<sub>d</sub>ugpa yaate<sub>p</sub>. I kristen tamaniak Korint daate<sub>b</sub>, ahilagnu yaate<sub>p</sub>. Kristus Jesus Nug ad emaitakpa u<sub>d</sub>at na<sub>d</sub>i heu<sub>m</sub> amupa ag Kayaknunab danab ah daate<sub>b</sub>. Nug ag opia awak daaglagnu ag onilagpa eum. Amge Nug agib onilagpa ii eum. Iita! Nug danab ah oh ag wan atu ohpa daana, ag Na<sub>d</sub>i Jesus Kristus onigpa unuq<sub>i</sub>dte<sub>b</sub> amu, ag oh onilagpa eum. Jesus amu Nug am ag ig ele, ig oh ihinig Na<sub>d</sub>i daate<sub>e</sub>. <sup>3</sup> Amu ig Mamenig Kayak, amu ihinig Na<sub>d</sub>i Jesus Kristus ele, ahilah ehanit<sub>a</sub>k oka<sub>i</sub> hamu megte<sub>p</sub> amu, ahilah ma<sub>d</sub>o<sub>d</sub> ele ahilagpa daaglahnu oonih daate<sub>e</sub>.

<sup>4</sup> Kayak Nug Kristus Jesusnu u<sub>d</sub>at oka<sub>i</sub>pa Nug ag nuhig ehanit<sub>a</sub>k oka<sub>i</sub> hamu megte<sub>e</sub>, Nug ag amu ma<sub>t</sub>o<sub>m</sub> amunu da haen oh Nug amegpa amunu, “Ena heme,” awe a<sub>t</sub>e<sub>m</sub>. <sup>5-6</sup> Ag Jesusnu nai doon, gagat<sub>a</sub>g adaeg u<sub>k</sub>e, ade<sub>k</sub>u batom amu Kayak Nug melemel amupa nai mehuqaknu amu keeke doyaknu ele amu ag gagat<sub>a</sub>g ma<sub>t</sub>o<sub>m</sub>. Nug ag anam ma<sub>t</sub>o<sub>m</sub> amunu da Nug amegpa, “Ena heme,” awe a<sub>t</sub>e<sub>m</sub>. <sup>7</sup> Nug gagat<sub>a</sub>g amu ag ma<sub>t</sub>o<sub>m</sub> amunu ag Jesus Kristus, Nug geha miag atieb anid<sub>k</sub>ulagnu ameg menana, tapadidna daanna, ag Kayaknu u<sub>d</sub>at he<sub>k</sub>ulagnu gagat<sub>a</sub>g laanu amu tutu ii meteb. <sup>8</sup> Jesus

Kristus Nug ag gemu ehanadte amu Nug anamib heeb ukeb, haen malakpa bataku amunu nuhig dedpa ag Kayak noobpa, ag danab bedulagpa nai iita daaglag. <sup>9</sup> Kayak, Nug adi hekunu ate amu Nug hete, Nug nuka ag Nug beka Jesus, ihinig Nadi, Nug ele laipu daaglagnu tituanatom.

### *TAMANIAK OOPA OBATAK OBATAK DAYOM*

<sup>10</sup> O lailad, da Jesus Kristus onigpa ag unuqadtem. Ag oolag laipu dayeg! Ag aib awa awa getak nai madipig. Iita, ag oolag laipu ele udat hekulagnu dab mekulag. <sup>11</sup> O lailad, Klowi baekudpanu laa ag da amelpa ag oolagpa a ona a doak laala beeg daateb amunu aeg doomi. <sup>12</sup> Da a ona a doak kobolnu matimi amu, da imunu ami. Ag oh ameg pide pide opatna daanna, nai aeg ona aeg dote. Ag anam henana amu laa nug, “Da am Paulus dim lamidtem,” awa aawo amu laa nug, “Da Apolos dim lamidtem,” awa ate. Amu laa nug, “Da am Petrus dim lamidtem,” awa aawo amu laa nug, “Da am Kristus dim lamidtem,” awa ate.

<sup>13</sup> Ag anam anam maditeb amge Kristus Nug am opatak kudum elete? Iita! Am da ag ehanate, ad emaitakpa mauhmite? Iita! Am ag Paulus onigpa layatak aopigte? Iita! <sup>14</sup> Am da ag oolagpa Krispas Gaias eleib layatmi, danab laa oh ag iita amunu da ool gamag ahaate. <sup>15</sup> Adinu? Danab laipu laa nug amunu inam akunu elele iita. “Da am Paulus onigpa layatak aomi.” <sup>16</sup> (Laa ele, da Stepanus baekudpa ag ele am da layadmi, da laa ele laaidmitai o iitatai am, da daulpa ii daate.) <sup>17</sup> Kristus Nug da danab layadkulnu meide ii udimi. Iita. Da Nai Ena amu mehuqkulnu he udimi. Amge

da wan imupan doyak danab nai maditeb bia da nai ii mehuqmi. Am da nai anam, ag maditeb bia mehuqlom amu, Kristusnu ad emaitak amu keeke hamu bia daalo amunu da amubia ii hemi.

### *KRISTUS NUG AMU KAYAKNU GAGATAG*

<sup>18</sup> Amu danab ag oolagpa genab ii dooteb ele, ag ad emaitaknu nai dab menan, nai amunu ag ahilag dab makpa, “Amuam kaaka nai,” aon ateb. Amge ig danab ah, Kayak Nug ig edua awikom ele amu, ig ad emaitak nainu, “Amuam Kayaknu gagatag,” aot atem. <sup>19</sup> Nai amunu Kayak naipa, nai laa daate. Nai amuam inam. “Da geha doyak danab dilag doyak amu hepi nauhebeb, am geha da danab dab mak ele dilag dab mak diigdiig kudum amu ele okulkul.”

<sup>20</sup> Amunu doyak danab nug atemun? Do mehuqak danab nug ele am atemun? Atemun wan danab nug ode alala ebate? Kayak Nug wan danabnu doyak amu he, nai amu kaaka iite daate? <sup>21</sup> Wan danab ag aka Kayaknu doyak aoglagnu am elele iita, ahilag doyakpa aoglagnu am ib iita. Kayak, Nug doyak okai nuhigpa amu Nug anam daakunu ena anta, Nug ib amu oo neum. Amge Kayak Nug danab ah edua diikunu ib iiku babaitom. Ag ad emaitaknu Nai Ena ig mehuqtem amu doona, ag Kristusnu oolagpa genab dooglag amu Kayak Nug edua diiku. Danab laa ag Nai Ena amunu amu ag, “Kaaka nai,” aon ateb. <sup>22</sup> Am Juda danab ag am kobol danab hekunu elele iita amu anidkulagnu gagatag wagai meegeg, Grik danab ag am doyak aoglagnu wagai meteb <sup>23</sup> amge ig ib adit amupa ii gotem. Iita! Ig Kristus

ad emaitakpa mauhom amunu nai mehuqtem. Ig anam mehuqutut, Juda danab ag nai amunu ag ehed doon, ag keked metaegeg, Grik danab ag nai amunu, “Kaaka nai,” aon anana, ii aoteb. <sup>24</sup> Juda amu Grik danab ele ag anam heteb amge ig danab, Kayak Nug oninigpa ete dootem ele amu, ig Juda danab amu Grik danab ele, ig dootem, Kristus Nug am Kayaknu gagatag amu Kayaknu doyak ele. <sup>25</sup> Kayak Nug keeke oh doote amunu Nug adi keeke laa hete, danab ag amunu, “Kaaka,” aon ateb amu, Kayaknu dab mak amu nug danab dilag doyak oh edidte. Aria Kayak keeke oh hekunu gagatag ele amunu Nug adi keeke laa hete, danab ag amunu, “Gagatag iita,” aon ateb amu, Kayaknu gagatag amu nug danab dilag gagatag oh edidte.

<sup>26</sup> Amu o lailad, imu am ag daulagpa doad! Kayak Nug anuka ag kristen daaglagnu onilagpa eum, haen amupa ag oolagpanu danab kudum ag wanpanu doyak okai iita, ag kudum amu onilag iita, amu gumak danab ele kudum iita. <sup>27</sup> Amge ag amunu aib otaipig. Kayak Nug kobol laala, wan danab ag amunu, “Kaaka kobol,” aon ateb ele amu, Nug doyak danab amu ag udalag nekunu, kobol amu tituanatom. Keeke wan danab ag amunu, “Keeke gagatag iita,” ateb ele amu, Kayak Nug danab gagatag ele amu, ag udalag nekunu keeke amu tituanatom. <sup>28</sup> Aria Kayak Nug wan imupan keeke onig iita, danab ag keeke amunu oolag ii daate, ag guhudidna lamidteb ele amu, Nug amupa heeb, keeke wanpan danab ag amunu keeke okai dooteb ele, amu iita mekulagnu diia tituanatom <sup>29</sup> amunu danab laa nug Kayak amegpa

nuka binag laa ii mema, keeke oh amu Kayakib heum. <sup>30</sup> Kayak Nugib ig Jesus Kristus ele laipu ou iqom. Aria Kristus Nug am doyak ena, ig Kayaknu aotemnu diig, ig danab tutuku daatemnu diig, ig opia awak ele daatemnu diig, amu ig gemu Satan epegpa ii daatemnu diig ele amu Nugib beum daate. <sup>31</sup> Amunu ig Kayak naipa, nai laa daate, amubia hetu! Nai amuam inam. “Laa nug onig humak hekunu oo daate amu nug Kayak onig aakuib humad!”

## 2

### *PAULUS KRISTUS AD EMAITAKPA MAUHOMNU MEHUQOM*

<sup>1</sup> O lailad, da anuka haen laa ahilagpa uke, Kayak nai genab amu mehuqi doopig amge da nai laala enanag elepa ag eedadkulnu o iita doyak okainab, danab ii dooteb elepa, ii mehuqmi. <sup>2</sup> Iita! Da dab mak dahilpa anten, gagatag doyen, haen da ag oolagpa dayeye da, “Keeke laa ohnu ele da ii dab mepa. Da Jesus Kristusnuib amu Nug ad emaitakpa mauhom amunu ele aakuib dab mein madikul,” awe ami. <sup>3</sup> Anuka da ukai, ag ele daamut, haen amupa da oolpa elele ii doomi, oolpa ug doyeye, dab mak kudum aomi. <sup>4</sup> Da nai matimi, da Nai Ena ele ag amelagpa mehuqmi amge da doyak danab heteb bia, dahil gagatagpa da ag ii ipuanadmi. Iita. Da Kayak Oudi ahilagpa udat heeb anidkulagnu, ib amupa ipuanatiti, Nug anam heum.

### *KAYAK OUDI NUG DOYAKNU DIIG*

<sup>5</sup> Da anam hemi, amunu diig am, ib laapa ag danabnu doyak amu aona, ag oolagpa genab dooglag dayeb, amuam ena iita, keeke hamu. Amge ag Kayaknu gagatag anidna, oolagpa genab dooglag amuam meu ele, iita ii mema amunu da anam hemi.

<sup>6</sup> Imu genab, danab Kayak kobolnu kalulag metak ele amu, ig ag amelagpa nai meu ib adeku gotē aakuib mehuqtem. Amge nai meu ena ele amu, amuam wan danab dilag doyak iita. Amu wan imunu iki, ahilag ele iita. Ag am iita mekulag.

<sup>7</sup> Amu Kayaknu nai ig mehuqtem ele, nai amuam loikumak daye udie, gemu batak. Nai amunu diig am Kayak amu Nug ig hab atannu ena daagnignu, wan imu ii dayom haenpa, nai genab amu meum daate. <sup>8</sup> Wan imupan iki danab oolagpanu amu laa nug doyak amunu diig amu laa ii antom. Iita. Ag doolob amu ag Nadi, Nug hab atannu anuqak gagatag ele daate amu, Nug ad emaitakpa ii atullob. <sup>9</sup> Kayak naipa, nai inam daate. “Kayak Nug keeke ena ena danab ag nuhignu oolag mauhte ele madakunu babaitom amu keeke amu danab laa nug amegpa ii antom, daugpa ele ii doyom, dab makpa ele ii beum. Keeke enanagnab.”

<sup>10</sup> Am nai amu loikumak dayom amge Kayak Nug he, nuhig Oudi amu ig ipunikom. Kayak Oudi Nug keeke oh anidte amu Nug Kayaknu dab mak oh, ihinignu loikumak daate ele amu, Nug anidte. <sup>11</sup> Am danab laa nug danab laanu dab mak ii doote. Iita! Danab amu nug oudi, nug danab amu oopa daate amu, nugib doote. Amubia danab laa Kayaknu dab mak amu ii doote, Kayak Oudi Nug nukā Nugib doote. <sup>12</sup> Ig keeke ena ena Kayak megte ele, ig

amu tutuku doota, adat oignignu amu Kayak Nug wan imupan oudi ii mekom. Iita, Nug nuhig Oudi mekom. <sup>13</sup> Amunu ig nai imu mehuqtem ele amu, ig amu wan danab laanu doyak aot ii mehuqtem. Iita! Kayak Oudi Nug ig ipunike, ig nai imu mehuqtem. Kayak Oudi Nug ipunike amu ig danab Kayak Oudi ele ag amelagpa Kayaknu dab mak amu mehuqtem. <sup>14</sup> Amge danab nug Kayak Oudi ii awom ele amu, nug Kayak Oudinu dab mak ii aote. Adinu? Nug dab mak amunu, “Dab mak kaaka,” anam dab mete. Dab mak amunu amu, Kayak Oudi Nug danab ehaniteb, nug dab mak amunu oo maidku amunu danab ag Kayak Oudi iita ele, ag am dooglagnu elele iita. <sup>15</sup> Am danab nug Kayak Oudi ele, nug keeke oh anen anen, laa am ena laa am nau ele amu, nug amu oh epediadkunu elele amge danab ag Kayak Oudi iita ele, ag danab amu epedidkulagnu elele iita. <sup>16</sup> Kayak naipa, nai laa amunu inam daate. “Aun nug Nadinu dab mak oh doote amunu nug aha, Nadi dab mak medaku? Laa iita!” Amubia Kristusnu dab mak ihinigpa daate amunu laa nug Kayak Oudi iita ele, nug epedigkunu elele iita.

### 3

#### *KAYAKNU UDAT DANAB*

<sup>1</sup> Genab ig kristen ig Kristusnu doyak aomut amge o lailad da ag amelagpa nai mehuqmi amu da danab Kayak Oudi ele, ag nai dooglagnu mehuqtem anam bia ii mehuqmi. Iita. Da nai mehuqmi amu da nai, danab dab mak alag ele dooglagnu mehuqtem, nai amubia ag amelagpa mehuqmi. Ag Kristus, nuhig kobolpa ag yud

daaegeg, nai mehuqmi. <sup>2</sup> Nid yud ag e gagatag ii lateb, ag huh lateb, amubia haen amupa da ag nai gagatag madapi, ag aoglagnu elele iita amunu da nai unuqagnab ii matimi, da nai gai iita aakuib matimi. Ag gemu ele nai gagatag aoglagnu elele ii daateb. <sup>3</sup> Adinu? Ag dab mak alagpa daateb. Kristen kobol amu ag bedulagpa ii beum. Ag lailkad dilag oolag nauhehe, ag nai aeg ona aeg do henan daateb amunu ig ag kobol alagpa, kristen kobol iitapa daateb anidkunignu elele. Kobol amuam dab mak alagnu, wanpan danabnu kobol. Ag heteb amunu ag am dab mak alagnu danab. Ag am wanpan danab. <sup>4</sup> Am danab laa nug, “Da am Paulusnu,” a, danab laa nug, “Da am Apolosnu,” ate, ag kobol amu ii uupig amunu ag wanpan danab daateb.

<sup>5</sup> Ag tutuku dab mak aon anteg! Apolos nug am aun? Am da Paulus am aun? I am udat danabib amu Nadi Nug i udat ihinih pide pide metom. Nug udat amu mete, i udat amu heudu, ag Kristusnu oolagpa genab doopig. <sup>6</sup> E epaknu meu amu da epai, Apolos nug le metom amge Kayak Nug he, e amu beum. <sup>7</sup> Anam amunu, e epak danab nug am onig iita. E le metak danab nug ele onig iita. Kayak Nug nuka he, e bete. Nug he, e bete amunu Nugib am onig ele. <sup>8</sup> Aria e epak danab, le metak danab ele, a oh am laipu amge udat ahilah anen anen. Keeke amuam keeke okai iita. Kayak Nug udat ahilah anta, melemel amupa nob ena mataku. <sup>9</sup> I am kadoi meda, Kayaknu udat danab daatep amu ag am Kayaknu dad bia daateb. Laa ele amu ag am Kayak laug daateb.

<sup>10</sup> Lag haknu doyak danab nug lag hekunu dayeb



amu nug tatam lag mawa daakunu keeke mete. Lag mawa daakunu keeke amu danab ag lag amu qadepa hepeg, ena daaku. Lag mawa daakunu keeke amuam lagnu diig. Aria Kayak ehanide, lag haknu doyak danab nug lag mawa daakunu keeke ena tutukuib mete, amubia da tamaniak tutuku enaib daakunu, nuhig diig daakunu, ag amelagpa Kayak nai mehuqmi. Gemu laala ag danab laa uḍin lag mawa daakunu keeke qadepa lag heteb, amubia da nai matimi, nai amupa ag udat tudidna heteb. Amge laala, ag anam heteb ele amu, ag dab menan heig! Ag mauhnoak aib hepig. <sup>11</sup> Adinu? Tamaniaknu diig laa ii daate. Da Jesusnu nai matimi aakuib am tamaniaknu diig daate amu danab laa nug diig laa heeb bekunu elele iita. <sup>12</sup> Amu danab ag lag mawa daakunu keeke qadepa lag heteb ele amu, ag keeke laalapa, ab eokunu elele iita, gol o iita silwa o iita men ena amupa lag hekulag. O amu iita ag keeke laalapa, ab eokunu elele, ad o iita qahak o iita wit gumu amupa hekulag. Amubia danab ag nai dahil aon tudidna udat heteb. <sup>13</sup> Aria danab ag lag, keeke pide pidepa hepig ele amu, ab lag amu eweb amu ahilag udat am miag atiku. Laala ag keeke ab eokunu elele iitapa udat hepig amu ahilag udat am ii iita mema. Amge laa ag keeke ab eokunu elelepa udat hepig amu ahilag udat am iita meku. Amubia ele danab ag dahil nai aon, udat tudidna heteb ele amu, ahilag udat am elele o elele iita am miag atiku. Ab nug heeb, lagnu udat am miag atiku, amubia Kayak Nug heeb, danabnu udat am miag atiku. <sup>14</sup> Laa nug udat heum ele amu, udat amu ena dayeb, danab

amu nug nob ena aoku. <sup>15</sup> Amge laa nug nuhig udat, lag ewa mala iita mete amubia iita meeb amu nug am nob ena ii aoma. Nug am padal ii mema amge nug am danab nauhkunu miagnab dayaya, oola uka, nauhak ii aote, amubia padal ii mema.

<sup>16</sup> Ag am Kayaknu lag, Kayaknu Oudi Nug ag oolagpa daate amu ag amu iite dooteb? <sup>17</sup> Udat danab laa nug Kayaknu lag heeb nauhku amu Kayak Nug ele danab amu heeb nauhku. Adinu? Kayaknu lag nug gun, amu ag aaku Kayaknu lag.

<sup>18</sup> Amge laa nug nugaka bupuidmanu dab mad! Ag oolagpanu danab laa nug wan imupanu doyak okai awom amunu nug, “Da am doyak danab,” dab mete dayeb amu nug genab doyak danab ba daakunu, nug wan imupanu doyak oh qeeb nad!

<sup>19</sup> Adinu? Wanpanu doyak amuam Kayak noobpa elele iita. Kayak naipa, nai laa daate amubia. Nai amuam inam. “Kayak Nug wan imupan doyak danabnu dab mak amu awa, doyak amupa ag nob nau madate.” <sup>20</sup> Amu Kayak nai aben laapa amunu ele inam daate. “Nadi Nug doote. Doyak danab dilag dab mak am keeke hamu, gagatag iita.” <sup>21</sup> Nai amu aaku daate amunu danab laa nug ig danab ig binanig ii mema. Genab keeke oh am ahilagnu.

<sup>22</sup> Paulus, Apolos, am Petrus, wan imu, bau dayak, mauhak amu keeke gemu daateb, keeke dimpa bekulag ele amu, keeke amu oh am ahilag <sup>23</sup> amge ag amu Kristusnu amu Kristus Nug am Kayaknu aaku daate.

## 4

*KRISTUS NUKA NUHIG UDAT DANAB TITUA-NADKU*

<sup>1</sup> Aria ag ihinignu inam dab mekulag am ena. “Ag am Kristusnu udat danab, Kayak nug ig adi hekunignu nuhig naipa ate amu ag apeg doognignu daateb. Udat amu ag gumateb,” aon akulag. <sup>2</sup> Ag inam anidkulag. Begbeg danab nug nuhig okai noobpa ena daakunu, nug nuhig danab okai udat adi adi hekunu ate amu nug udat amu oh anamnab heku. <sup>3</sup> Begbeg danab ena hete bia da ele anamib hei udie, gemu ele hetemtai? Eetai, danab laala ag da epedilna, amunu adi ateb amu da ii dootem. Amu ag adi ateb da amunu ele da dab mak okai ii aotem. Genab, da daka ele da epedilen, amunu adi dab mak aotem amu da amunu genabnab dab ii metem. <sup>4</sup> Da Nadi noobpa keeke laanu da ehed hemi, amunu laa da ii dootem amge amu Nadi noobpa da genabnab da bedulpa ab iita ii ipunigte. Nadi Nugib da epedilte. Nug da bedulpa am ab iita aum amunu da anam genab dootem. <sup>5</sup> Epediak udat amu ig gemu ii gumatem amunu haen gamag imupa ig anam ii hemata. Ag Nadi udikunu haen ameg meig! Nug udia, keeke oh gatatupa lokumak daateb amu heeb, amahlakpa miag atipeg, aria geha heeb, danab oh dilag dab mak adinu keeke laala hepig amu miag beku. Haen amupa geha Kayak Nug ig danab oh laib laib ihinig haknu nob tutuku megaku.

### *KORINT AG AKA BINALAG MEPIG*

<sup>6</sup> O lailad, da ahilag dab makpa nai imunu meu adeku daate amu anidkulagnu, da Apolos ele i bedunihpa yen atem. Amupa ag nai laa, “Yak niite aakuib ag dab menan oiyeg!” nai amunu diig doonna, ag danab laa onig ii humana, laa onig

tabapeg ii nema. <sup>7</sup> Aun na danab okai meitom? Keeke adi laa na Kayak nuhigpanu ii aome? Kayak Nug na keeke oh meitom amunu adinu na binan mena, keeke amu diig daatem bia dootem?

<sup>8</sup> Ag Kayak nai elelenab aopig daateb bia dooteb amge amuam genab iita. Ag keeke laanu dadek ii daateb bia dooteb amge amuam genab iita. Ehanitak ihinig iitapa ag king bena daateb dooteb amge amuam genab iita. Ag genab king daalob amu ig ag ele oh king daalom amunu da ag king daaglagnu ool daate. <sup>9</sup> Ded laala da inam dab meitem. Kayak Nug ig total nuhig otikom, ig udat amupa oitem ele amu, Nug laa oh dimulagpanab, ig danab banpa adualadna aqapeg mauhkulagnu otiadpig, amubia daatem. Genab ig wan atu ohpa, engel danab oh ele noolagpa ehed anigkulagnu meike daatem bia ded laala anam dootem. <sup>10</sup> Ig total danab ig wan imupan danab amelagpa, Kristusnu kaaka danab, danab gagatag iita, danab binalag ele iita daatem amge ag Korint danab ag aka ahilagnu amu ag, “Ig am Kristusnu doyak danab, ig am danab gagatag ele, ig am binanig okai ele,” aon ateb. <sup>11</sup> Yo, ig total ig udat imu wan imupa heutut, dig ma udie, gemu ele enug iqege, baanig qada edate, bedunig hautaknu lamen ele ena iita daatem. Laa ag epelag bitakan bedunig ohpa oigteb. Ig dayaknu aben ele iita. <sup>12</sup> Keeke aognignu amu iiku epenigpa udat nadi hetem. Laa ag ihinignu awa awa qetak nai matiegeg, ig nai enapa ahilag nai nob meitem. Ag ig ehed heikegeg, ig amu maot oitem. <sup>13</sup> Ag ihinignu nai nau ehednab aegeg, ig nai bodo etakpa ag amelagpa atem. Ig am wan ohpanu

kinipan daate amubia daatem. Ig danab oh dilag kinipan daatem. Ig anamib daaut udie, gemu ele daatem.

<sup>14</sup> Da hepi, ag udalag nekunu ii yaatem. Iita! Ag nid naunau dahiladnab bia, ag ehed go-mananu amu da ag ib ipuanadkulnu hetem. <sup>15</sup> Ag kristen daanna, ag ipunitak danab kudumnab ag ehanadkulagnu aoglagtai. Ag aoglagnu dayeb am aoglag amge amuam heeb, keeke laa ii baolima. Keeke ii baoliku amuam da Jesusnu Nai Ena amu mehuqi, ag oolagpa genab doopig amunu da ag mamelag daatem amunu ag dimpa mamelkad kudum ele ii daamna. <sup>16</sup> Da ag mamelag daatem amunu ag oiyak dahil anidteb ele amu, ag kobol amupa oiglagnu unuqadtem. <sup>17</sup> Diig amunu da Timotius mepi, ahilagpa gokunu hetem. Nug dahil nid, da nuhignu ool huana mauhte. Nug Nadinu udat dab meta auta aote. Nug da Kristus Jesusnu kobol dim lamidtem ele amu ipuanadku. Da kobol anampaib kristen tamaniak aben ohpa ipuanadtem.

<sup>18</sup> Da Timotius mepi ahilagpa goku amge dimpa da ele gumate gokul. Da tatam ii gomi, dimpa gokul amunu ag laala, “Nug edua ig gumika ii udim,” anana amu ag da nai doyak ena ele amelagpa atem amu ag nai amu di metan, ag aka ag binalag humateb. <sup>19</sup> Ag anam heteb amge, Nadi Nug oo dayeb amu da ag gumate gokul. Ukena amu nai tape nak danab amu ahilag ham bupuak amu antena, gagatag ahilag ele amu genab daate o iita, amu ele da anidkul. <sup>20</sup> Adinu? Kayaknu do madod amu naipaib ii bete. Iita. Kayak ebehipa bete. <sup>21</sup> Aria ag atemtai? Ag kobol ahilag ii bapaidpeg amu da bu

ade ahilagpa gokulnu oolag daatete? O iita ag edun ena hepeg amu da oo doyak kobol, kobol bodo etak elepa gumaten gokulnu oolag daatetai?

## 5

### *KORINT TAMANIAK OOLAGPA GAPAI KOBOL NAU DAYOM*

<sup>1</sup> Aria laa ag nai genab matinna, ag Korint ag oolagpa gapai kobol nau daate aeg doomi. Gapai kobol ag heteb ele am naunab nau! Genab, iita adi danab ag gapai kobol nau amubia ii heteb. Kobol amuam danab laa nug mameg wau ele gapai adapid. <sup>2</sup> Kobol amu beum daate amunu ag, "Ig am binanig ele," akulagnu genab elele iita amge ag anam ateb. Ag uda nak doolob am ena. Danab nug kobol amu heum ele amu, ag nug kristen tamaniak oopa daamanu gedidpeg dimitim golo am ena. <sup>3</sup> Genab da gemu ag ele oh ou qak ii daatem amge da ag dab madete, da ag ele oh ou qak daatem bia dootem amu, da danab nug kobol heum amu da nuhig hak amu aaku epedidmi. Da apa dayeye epedidlom bia epedien, ag inam hekulagnu atem. <sup>4</sup> Ag Nadi Jesus onigpa qag mena, dahil dab mak amu ihinig Nadi Jesusnu gagatag ele ag ele oh daapeg, <sup>5</sup> aria danab amu ag aon, Satan epegpa mepeg, nug udat nuhig heeb, bedu ehed aweb, danab amu nug Satan dim lamidkunu am ena iita doyeb, dimpa Nadi Jesus edua udieb, Kayak Nug danab amunu oudi edua awa, bau ena daakunu medaku.

<sup>6</sup> Ag aka ag binalag meteb amu ena iita. Bret titidkunu keeke onig yis amu nakokib udat he, plaua oh titidte, ag amu iite dooteb? Aria kobol nau

am yis bia. <sup>7</sup> Ag yis amu budipeg ukad! Ag anam hepeg, iita meeb amu ag bret yis iita bia daaglag. Amu ag Kristus ele ou qak genab daateb amubia dayeg! Adinu? Kristus Nug Pasowanu sipsip nag ihinig, Nug nuhig mauhakpa aaku ihinig nob nau awa malom. <sup>8</sup> Amunu ig Pasowa metid hobulpa bret yis alag elepa, ii lamata. Yis amuam opodi be, amya oiyak kobol, am hipunin laa oh hak kobol ele. Ig Pasowa hobulpa bret yis iita ele lakunig. Bret amuam kobol tutuku, kobol genab ele.

<sup>9</sup> Aria, da ad udug tatam ahilag nu yaami amupa da nai inam yaami. “Ag gapai danab ele aib tamanipig.” <sup>10</sup> Da anam yaami amge da ag wan imupan gapai danab oh, danab keeke awaknu udat aakuib heteb oh, amu yabhoi danab oh, amu kayak ham bupuak binag mak danab oh ele uuadkulag nu ii ami. Ag anam helob am ag wan imu uulob. <sup>11</sup> Amge da nai aaku yaami, amu diig am inam. Danab laa nug ag ele kristen tamaiak oopa laipu daateb, nug gapai kobol hete, o nug keeke awaknu udat aakuib hete, o nug kayak ham bupuak binag mete, o nug laanu awa awa qetak nai eheda te, o nug le gagatag la, kaaka qete, o nug danab laanu keeke yab aote, nug gadaib kristen dayaya, hipunin amu miag atiak haaha oite ele amu, kristen danab ag nug ele aib tamanipig, ag nug ele aib ou qak daapig.

<sup>12-13</sup> Danab kristen tamaniak dimitim daateb ele amu, da ag epediadkulnu ii daatem. Am dahil udat iita. Kayak Nugib ag adi hepig amunu epediadku amge danab ahilag tamaniak oopa daateb ele amu, epediatak udat amuam genab ahilag udat daate amunu ag danab ag oolagpa kobol nau hete

ele amu nug gedidpeg dimitim dayad!

## 6

### *KRISTEN DANAB NUG LAYAG HETODIAKPA II MEMA*

<sup>1</sup> Aria ag oolagpa laa nug layag nu nai ele doyaya, nug kristen tamaniak bapaidkulag nu dab ii mete. Iita, nug danab Kayak ii dooteb ele, danab amu noolagpa hetodiakpa mete. Nug anam hete amge kobol amunu nug uda iite nete? <sup>2</sup> Kayak nu danab ag wanpan danab ah dilag kobol amu oh epediglag amu, ag iite dooteb? Genab ag Korint ag geha wanpan danab dilag kobol amu epediglag amunu keeke okai iita ele, ag amu babaitaknu am elele iitate? Ag am atemtai? <sup>3</sup> Am ig kristen, ig geha engel dilag kobol ele epedignig, ag amu iite dooteb? Genab ig geha ahilag kobol amu epedignig. Ig anam hekunignu doognig amunu wan imupan nai am ig epedignignu elele iitate? <sup>4</sup> Anam amunu aria ag wan imupan keekenu nai am adinu ag danab kristen tamaniakpanu iita amu ag gumadna gona, epediak udat imu madateb? <sup>5</sup> Da nai imu atem amu ag udalag neeb, kobol tutuku hekulag nu atem. Ag oolagpa danab laa, nug eamag adit ehed hepid ele amu, ahilah nai epediatkunu doyak ele laa iitate? <sup>6</sup> Ag doyak amu iita amunu ag lailkad hetodiadkulag nu amu ag danab Kristus nu kobol ii dooteb ele amu, ag noolagpa hetodiadteb.

<sup>7</sup> Amu ag lailkad ele nug hetodina, hetodiakpa maadteb ele amu, amupa ag nena qeteb. Ag oolagpanu amu laa nug layagpa ehed heeb, nug layag nug nob ii medaku am ena. Nug nuk a ug



amu mawa oiku am ena. Hetodiakpa mak am ena iita. O ag oolagpanu laa nug layagnu keeke yab aweb amu layag nug nob ii medaku am ena. Nug nuka ug amu mawa oiku am ena. Hetodiakpa mak am ena iita. <sup>8</sup> Amge ag anam ii heteb. Ag aka aka kristen lailkad dilagpa keeke yab aoteb. Ag aka aka kristen lailkad dilagpa ehed heteb. Ag anam henana, ag danab nau heteb bia helob am ele nau amge ag naunab heteb. Ag lailkad dilag, amuam kristen laala, ahilagpa kobol nau amu heteb.

<sup>9</sup> Ag imu iite dooteb? Danab ag hipunin heteb ele amu, ag Kayaknu do madod oopa ii daamna. Na naka nahipnu aib ham bupume. Aun adi ag gapai heteb, o aun adi ag kayak ham bupuak binalag meteb, o aun adi ag danab danabib gapai heteb, o danab aun adi ag ah bia oiteb, <sup>10</sup> o aun adi ag yabhak kobol heteb, o aun adi ag enulag okai nadinab aoglagnu wagai meteb, o aun adi ag le gagatag laeg, kaaka aqate, o aun adi ag dimug nai maditeb amu, danab ah amu ag oh Kayaknu do madod oopa ii daamna. <sup>11</sup> Ag oolagpa laala amubia oitapig amge Kayak Nug he, hipunin ahilag iita meum. Nug he, ag nuhig do madod oopa, Nug oo atem daate amu hekulagnu opia awak daateb. Kayak Nug he, ag Nug noobpa elele daateb. Nug amu oh Nadi Jesus onigpa amu nuhig Oudipa ele heum.

### *KAYAK BINAG MAKNU KOBOL*

<sup>12</sup> Genab Kayak keeke hekunignu ib babaitom daate, da keeke amu oh hekulnu am elele amge keeke oh da ii ehanidte. Keeke amubia oh am da hekulnu elele amge da keeke laa waapa ii daapa. Iita, keeke am da waalpa daaku. <sup>13</sup> Genab, gemu e

nug oonignu daate, oonig nug e aokun daate amge a oh am gemunuib. Kayak heeb, a oh iita mekulah. Amge e oonignu daate, ig oonig e aokunu daate amubia ig bedunig am ig amupa gapai hekunignu ii daateb. Iita. Ig bedunig am Nadinu keeke. Aria Nadi Nug am ig bedunignu amu ig bedunig amu nuhignu daate. <sup>14</sup> Amu Kayak Nug nuhig gagatag amupa he, Nadi edua hibaitom. Am geha ihinigpa ele anamib heeb, ig edut ahagnig. <sup>15-16</sup> Ag bedulag anen anen am Kristus bedu laih naunau kudum daateb amu ag iite dooteb? Laa ele amu ag danab nug ib baag ah ele a bedulah laipu ou qetep amu a bedulah laipu daatep amu, ag iite dooteb? Kobol amunu Kayak naipa, nai inam daate. “A oh amu bedulah laipu daaglah.” Aria ig bedunig anen anen am Kristus bedu laih naunau kudum daateb amunu da Kristus bedu laih nakok laa awen, ib baag ah bedu laih nakok laa daakunu mekul am enatai? Anam iitanab! Da anam ii hepa. <sup>17</sup> Danab nug ib baag ah ele bedulah laipu ou qetep, a am bedulah laipu daatep amge danab nug Nadi ele ou qak daatep, nug aaku Kayak Oudi gagatagpa Nadi ele laipu daatep.

<sup>18</sup> Ag gapai kobol amu uun qe edidna oolna ukeg! Adinu? Hipunin laa oh, danab ag heteb ele amu, ag kristen tamaniak heeg nauhte amge danab nug gapai hete amu, nug he, kristen tamaniak nauha autanab aote. <sup>19</sup> Ag bedulag am Kayak Oudi laug gun ele amu, ag iite dooteb? Kayak Nug nuhig Oudi matom, ag oolagpa daate. Ag amu, ag aka ahilagnu iita. Ag am Kayaknu daateb. <sup>20</sup> Adinu? Kayak Nug ag edua diikunu daden maatom amunu ag Kayak binag mekulagnu amu ag bedulagpa ele

Kayak binag meig!

## 7

### *EWAU DILAG NAI*

<sup>1</sup> Gemu da nai imupa ag ad udug meeg, dahilpa doum amu da iiku nob metem. Danab laa nug nug awak ii heku amu ele ena. <sup>2</sup> Amge gapai kobol idu idu daate amunu danab oh anen anen ag ah diiglag amu ah ag ele ag anen anen ahilag danab diiglag am ena. <sup>3</sup> Amu danab bedu amu nuhig ahnu keeke, am danab nug bedu haka ii aoma. Anamib, ah nug bedu amu danabnu keeke, ah nug ele bedu haka ii aoma. <sup>4</sup> Amu diig amu, ah nug nuka nug bedu ii gumate. Iita. Nuhig danab ele oh gumatep. Anamib, danab nug nuka nug bedu ii gumate. Iita. Ah nuhig ele oh gumatep. <sup>5</sup> Ag nug aopig ele amu, ewau laa oopa laa nug aib laa guhudita, wagai ma, nug bedu haka awom. Amge a Kayak unuqidkulanu heya, oolah laipu meya, haen tutu tituankulah, haen amupa a nug ii aomya, amuam elele. Amge haen tutu amu maleb, Satan a gapai kobol hekulahnu eedatmanu, a edui, nug aoglah. <sup>6</sup> Da do mein, “Ag nug aweg!” ii atem. Iita! Ag anam hekulagnu oolag dayeb amu ag hekulagnu elele, aakuib atem. <sup>7</sup> Am danab oh ag da bia daaglagnu ool daate. Amge danab oh ag anam daaglagnu elele iita. Adinu? Kayak Nug nuhig oo metakpa, nuhig keeke ena ena nob iita hamu metakpa amu ag adi hekulagnu anen anen matom.

<sup>8</sup> Aria nai imu am danab ah nug awak ii hepig amu ah qab ele dilag. Da ahilagnu inam atem. Ag am da daatem anam daapeg amu elele. Ug laa iita.

<sup>9</sup> Amge ag oolag bedulag ele dab metaglagnu elele ii doonna amu ah nug danab aoku, danab nug ah aoku. Ag nug awak hena amu ag elele daaglag, ag oolag nug gapai kobolnu ii eedadma.

<sup>10</sup> Am danab ah nug aopig ele amu, da amu dilag do am iiku madatem amge dahil do iita. Nadi Jesusnu do. Do amu inam daate. Ah nug nuhig danab ii uuidma. <sup>11</sup> Amge nug danab genab uuidku dayeb amu nug hamu dayad! Hamu daakunu elele ii dayeb amu nug edua ukeb, danab nuhig ele oolah laipu meya dayed! Danab nug ele nug ewau aib okulom.

<sup>12</sup> Aria do imu am da daka atem, Nadi Jesus ii aum. Do amuam inam. Ig lainig laa nug Kristusnu oopa genab doote dayeb, nug ah nuhig ele a ewau daatep amu ah nug Kristusnu oopa genab ii doote amge ah nug a nug awak daaglahnu oo daate amu ig lainig nug nug awak ahilah aib otadom.

<sup>13</sup> Aria ah laa nug Kristusnu oopa genab doote dayeb, danab nuhig amu nug Kristusnu oopa genab ii doote ele amge danab nug a nug awak daaglahnu oo daate amu ah nug nug awak ahilah aib otadom. <sup>14</sup> Amu ag doyeg! Danab nug Nadinu oopa genab ii doote amge ah nuhig nug oopa genab doote, nug ahpa Kayaknu tituanak daate. Aria ah ele oopa genab ii doote amge nug gamu nug oopa genab doote, nug danabpa Kayaknu tituanak daate. Anam iita amu nid menuadkulah, ag am iita adi bia daalob amge anam iita. Nid amu ag Kayaknu tituanak daateb.

<sup>15</sup> Aria danab nug oopa genab ii doote ele, nug ah nuhig uuidkunu oo dayeb amu ah nug danab amu adeb, ewau daaglahnu aib wagai meum. Aria

danab nug ele anamib heku. Laa nug Kristusnu oopa genab doote, nuhig ewau am oopa genab ii doote amu, Kayak nug laa, nug oopa genab doote ele, nug ewau daaglahnu wagai mekunu ii aum. Iiṭa! Kayak Nug ag oolag madod ele ena daaglagnu onilagpa eum. <sup>16</sup> Ah na geha na danab nahip ehanidpe, nug oo edueb, kristen daakute o iṭa amu na ii dootem. Aria danab na, geha na ah nahip ehanidpe, nug oo edueb, kristen daakute o iṭa amu na ele amu ii dootem.

### *KAYAK NUG DANAB EDUA AWEB NUG ATEM OIKU*

<sup>17</sup> Amge Nadi Nug na wanpa oikutnu, na kobol adi hekutnu mete doona daanna heme amu aria, Kayak Nug na oninpa e, na kristen daanna am na kobol ena amu heme ele amu gemu anamib oikut. Da kristen tamaniak ohpa do laipu aakuib madatem. <sup>18</sup> Danab laa nug gada otadom ele, dimpa Kayak Nug onigpa e, nug oo edue, aria nug amu lokumita bedu edua aib babaitom. Am danab laa nug gada ii otadom ele, dimpa Kayak Nug onigpa e, nug oo edue, aria nug aib gada otadom. <sup>19</sup> Gada otadak amu keeke hamu, gada ii otadak amu ele keeke hamu amge Kayak ode dim lamidkunignu am keeke okai. <sup>20</sup> Danab nug adi udat laa, Kayak nug metom ele amu, nug amu heehe, Kayak onigpa e, nug oo eduom amu nug udat amuib had! <sup>21-22</sup> Amu danab nug begbeg udat haaha dayeye, Nadi onigpa e amu aria Nadi noobpa nug am begbeg danab iṭa. Anamib, danab laa nug begbeg iṭa, nug hamu dayeye, Kayak onigpa e amu aria nug am gemu Kristusnu begbeg daate amunu na begbeg udat heehe, Kayak na

oninpa eum dayeb amu aria na amunu ootpa ug aib doome amge na begbeg udat amu edun ii he-mananu ib nahip dayeb am na keeke laa hekutnu uke! <sup>23</sup> Am Kayak Nug Jesus mauhom amupa ag daden maatom amunu ag danab dilag begbeg daaglagnu aib hepig. <sup>24</sup> O lailad, danab laa nug adi udat laa, Kayak nug metom ele amu, nug heehe, Kayak onigpa e, oo eduom dayeb amu nug amu anamib tuditeb, Kayak ehanitebeb had!

### *DANAB AH NUG II AOPIG ELE DILAG NAI*

<sup>25</sup> Aria od mak ahilag laanu amu, danab ah nug ii aopig ele ahilagnu amu Nadi Nug do laa da akulnu ii ipunidom. Da dahil dab mak maditem amge Nadi Nug dahilnu oo gai iita doyaya, Nug da tituanidom amunu nai da atem imu ag oolagpa amunu genab dooglagnu am elele. <sup>26</sup> Am dahil dab makpa gemu haen imupa ug okai beteb amunu gemu ag danab o ah iita ele daateb, da ag anamib daaglagnu ena dootem. <sup>27</sup> Na ah aome, amu aria na nug awak otadkutnu aib dab meme. Am laa na ah ii aome, hamu daatem amu aria na aib ah aokutnu heme. <sup>28</sup> Amge na ah aokut am ena, hipunin iita. Aria ah makun nug danab aoku, nug awak amu ele am hipunin iita, am ena. Amge danab ah ag nug aoteb amu wanpan ug okai idu idu daateb amu da ug amu ahilagpa ii bemanu ool daate.

<sup>29</sup> Amunu o lailad da nai imu atem. Haen tutu meum amunu haen gamag imupa amu ag inam dooglagnu atem. Danab ag ah aopig ele amu, ag am ahilag dab makpa, "Ig ah ele amge ig ah iita bia daagnig," dab menan daaglag. <sup>30</sup> Aria danab ag gaateb amu ag ii gaateb, hamu daateb, anam

bia daaglag. Danab ag gamalag ahate amu ag gamalag ii ahate, hamu daateb, anam bia daaglag. Danab ag keeke daden mena adateb amu ag keeke laa ii adateb, “Ig keeke iita, hamu daatem,” bia doonna daaglag. <sup>31</sup> Danab ag wannu keekupa udat heteb amu ag am, “Ig wanpan keeke imu gagatag ii adatem. Ig keeke laa ii adat hamu daatem,” amubia dab menan daaglag. Ig dootem, geha wan imu am baolieb, gemu daate amubia ii daama.

<sup>32</sup> Da ag keeke kudumnu ug ii doon oiglagnu ool daate. Danab ah ii awom ele amu nug am Kayaknu keeke dab maama, Kayak Nug adi keekenu oo hete amu nug amu hekunu hete. <sup>33</sup> Amge danab nug ah awom ele amu nug amu wannu keeke dab maama, nug wau adi keekenu oo hete amu nug amu hekunu hete. <sup>34</sup> Aria amupa nug nuhig dab mak am laipu ii daate, opatak adit daate. Ah danab ii awom, nug hamu daate ele amu, nug Kayaknu keeke dab maama, nug nug bedupa, nug oudipa ele amu nug Kayakib dim lamidkunu hete. Amge ah nug danab awom ele amu nug wannu keeke dab maama, nug gamu adi keekenu oo hete amu nug amu hekunu hete. <sup>35</sup> Am da nai imu atem amu ag ehanateb ena elele daaglagnu atem. Nai imu da ag otadate ii matimi. Iita! Ag Kayak noobpa tutuku elele ena daaglagnu ool daate amunu ami. Ag anam hepeg, geha keeke laa nug ahilag dab mak Kayaknu daate amu ii eedma.

<sup>36</sup> Amge danab laa nug nid ahin laa ele a nug titunyaib oiiya, a nug ii aoya, ah amu nug nug awak haen edidkunu heeb, amu danab amu nug, “Da ah amu nuhigpa ena ii hetem,” doyaya, a nug

aoglahnu oo huana dayeb amu a nug awed! Nug anam heku amu nug amupa hipunin ii hema. A nug aoglah am ena. <sup>37</sup> Amge danab laa nug amunu ii dab maama, oo amupa gagatag daate, keeke laa nug ii dutunte, nug nukā dab mete, dab mak nuhig ib laipupa dayeye, nug amu ada oite amu nuhig ah tituanak daate amu ii aoma, ah nug anam hamu daaku, amu nug ele am ena hete. <sup>38</sup> Amu danab ah a nug tituanoya, dimpa nug aotep amu danab amu nug kobol ena hete. Amge danab ah a nug tituanoya, dimpa a nug ii aotep amu danab amu nug am enanag hete.

<sup>39</sup> Amu danab ah nug aopid amu ah amu nug danab amu ele a ou qak laipu daaglahnu aakuib dab meku. Amge nug gamu mauhku amu nug danab laa aokunu am ib oo nak iita. Nug danab laa aokunu oo daate, nug danab amu aokunu elele. Am nai iita amge nug danab laa nug ele Jesusnu oopa genab doote aakuib aoku. <sup>40</sup> Amge da dahil dab mak am inam. Nug danab awak uua, hamu daaku amu nug gamag ahak okai aoku. Amuam dahil dab mak amge Kayak Oudi Nug ele anam maidte bia dootem.

## 8

### *DOD MAIN KAYAK HAM BUPUAK MEDAPIGNU NAI*

<sup>1</sup> Aria dimitimnu danab, ag oolagpa genab ii dooteb ele amu ag dod main kayak ham bupyak medteb amu ig kristen ig tepu amu lakunigtai o iitatai amunu apig amu da nai amunu iiku nob mein, diig api dooglag. Genab, ig oh am doyak ele amge ded laala doyak nug nukā dayeb amu



nug heeb, danab nug doyak ele nu<sub>ka</sub> binag me<sub>ku</sub>. Amge layagnu oo mauhak kobol amu nug heeb, ge<sub>ha</sub> Jesusnu tamaniak ena tutuku gagatag ele daaku. <sup>2</sup> Am danab laa nug nu<sub>ka</sub>, “Da amu doyen malami,” ate amu, danab amu nug am doyak elele ii awom, hamu ate. <sup>3</sup> Amge danab nug Kayaknu oo mauhte ele amu, Kayak Nug danab amu epedia, nuhig tituanom.

<sup>4</sup> Aria dod tepu main kayak ham bup<sub>uak</sub> medateb lanak amunu amu da inam atem. Ao ig dootem, kayak ham bup<sub>uak</sub> amuam keeke genab iita, danabnu dab mak aakuib. Amunu ag dotolag heteb am keeke laa genab ii ipunigte. Kayak laipu aakuib daate <sup>5</sup> amunu kayak ham bup<sub>uak</sub> habpa o wanpa ele daalob am atemun? Genab kayak ham bup<sub>uak</sub> kudum amu nadi ham bup<sub>uak</sub> kudum ele daalob amuam ihinigpa keeke hamu. <sup>6</sup> Adinu? Ihinig Kayak amu laipu daate, Nug am ig Mamenig, Nug am keeke ohnu diig daate amunu ig am nuhikudib daatem. Nadi ele am laipuib daate, Nug am ihinig Nadi, Jesus Kristus. Nug keeke oh hatom amu ig nuhigpa bauklel aotem.

<sup>7</sup> Keeke amu anam daate amge danab laala ag doyak amu ii aopig. Ag am anuka kayak ham bup<sub>uak</sub> amu binag hanhan medapig, amupa ag gemu dod tepu amu lanaknu amu ag, “Ig kayak ham bup<sub>uak</sub> binag mematanu, ig dod tepu imu, ag main kayak ham bup<sub>uak</sub> medapig ele amu, ig ii lamata,” aon ateb. Ag anam dab meteb, ag oolagpa ulum nai, Kayak megte ele, amuam gagatag iita amunu ag lalob amu ag, “Ig ehed hetem,” doolob. <sup>8</sup> Amge e nug ig omaikeb, Kayak topa ii gomata. Ig e ii lakunig dayeb amu ig anen anen, “Da e amu ii

latem amunu da Kayak noobpa elele iita daatem,” ii amata. O ig e lakunig dayeb amu ig anen anen, “Da e amu latem amunu da Kayak noobpa enanag daatem,” amu ele akunignu elele iita.

<sup>9</sup> Amge keeke ag aka ahilag dab makpa ag amu hekulagnu elele dooteb amu, amupa ag laala Kayaknu kobol oh ii doopig ele amu, ag ag eedadpeg, hipunin ibpa gomananu ag dab meig! <sup>10</sup> Adinu? Na aun na dod tepu laa, danab ag tepu amu main kayak ham bupuak medapig ele amu, na Kayak Nug na tepu amu lakutnu am nau ii doote, na doyak amu aon malame amu na gona, kayak ham bupuak mana metak laka daana, e amu labepe amu danab laa, nuhig oopa genab doyak am gagatag iita ele amu, nug na anita, dod tepu main, kayak ham bupuak medapig ele, nug amu lakunu dab mak awa laku. <sup>11</sup> Na anam hekut amu doyak nahip nug amu danab laa, nug Kristusnu oopa genab doote amge gagatag iita, Kristus nug danab amu edua aokunu mauhom ele amu, nahip doyak he, ib ehedpa gote. <sup>12</sup> Anteg! Ag kristen laala, ahilag dab mak Kristusnu gagatag iita ele amu, ag ahilagpa hipunin amu hena, ahilag oopa genab doyak amu heeg nauhte amu, ag haen amupa Kristus nuhigpa ele hipunin heteb. <sup>13</sup> Anam amunu da dod tepu ag main, kayak ham bupuak medapig ele amu, da amu lapi, kobol amunu da layal nug hipunin heku dayeb amu, aria da dod tepu amu baula ii lapa. Da hanhan amu di meten oipi ukeb, wan haen iita meku. Adinu? Da hepi, layal nug hipunin hemanu dab metem.

## 9

*TOTOL AG KEEKE TAMANIAKPANU  
AOGLAGNU ELELE*

<sup>1</sup> Da hepi danab laa ehedpa gomanu dab metem amunu ag da do waapa dayeye hetem bia dootebte? Anam iita, da donu begbeg ii daatem. Da am total danab. Da am ihinig Nadi Jesus Kristus anidmi. Am da Nadinu udat laa hei, ag da udat hemipa ag kristen daateb. <sup>2</sup> Am danab laala ag dahilnu, “Nug am total danab iita,” dootebtai o iitatai, da ii dootem amge ag Korint daateb ele amu, ag am anam dooglagnu elele iita. Adinu? Da nai matiye, ag Jesusnu oolagpa genab doopig amunu da am genab total danab daatem, ag amunu am eponak keeke bia daateb.

<sup>3</sup> Am laa ele, danab laala ag da biilpa yak nai maditeb amu da edue amelagpa inam atem. <sup>4</sup> Da tamaniak epelagpa e le ele lakulnu amu elele iitate? <sup>5</sup> Amu da kristen ah laa aopi, udat hekulnu oh oignihnu, total danab laa am Nadi laikud laa oh am Petrus ele ag heteb bia elele iitate? <sup>6</sup> Amu da Banabas ele i iya tamaniak epelagpa e le ele aognihnu elele iitate? I iya keeke amu aognihnu men dodonu udat hekunihte?

<sup>7</sup> Am danab laa nug ban danab daate ele amu, nug amupa nuhig e iite aote? O danab laa nug grepnu dad gumate amu nug grep lepu iite late? O danab laa nug meme gumadte, nug udat amu haaha, meme huh amu iite late? <sup>8</sup> Am da danab dilag dab mak amuibte dim lamiten, da nai imu atem? Dopa amu nai amunu laa iite daate? <sup>9</sup> Yo, Moses nug do naipa nai laa amunu yom am inam. “Makau nug wit meu mumudkunu tabate amu na

aib ode hautme,” awa aum. Am Kayak Nug dod bulmakau dilagibte dab ma aum? <sup>10</sup> Anam iita! Nai amu ihinignu ele ate. Ao, Moses nug Kayak ode awa yom, amuam ihinignu ele aum. Adinu? Danab nug e epaknu wan opate amu nug e meu oduab, meu maha aokunu dab maama udat heku amuam elele. Amu meu awak danab ele anamib.

<sup>11</sup> Aria ig Oudinu keeke ag oolagpa epamut amunu ig bedunig ehanitaknu keeke amu ag ig mekaglagnu am ena iitate? <sup>12</sup> Danab laala ag ahilagpa dim gona, nai mehugegeg, ag keeke madateb amunu da Banabas ele ahilagpa keeke aognihnu eledenab daatep. Amge keeke i aolopnu elele amu i ii aotep. Adinu? I keeke amu aolop amu Kristusnu Nai Ena ag aoglagnu, ib am oo nekunihtai amunu ug laala oh amu i aaku maotep. <sup>13</sup> Ag imu iite dooteb? Danab ag mana metak laka udat heteb ele amu, ag ahilag e mana metak lakanu aoteb. Amu danab ag dod main Kayak medteb ele amu, ag qadabpanu e aoteb. <sup>14</sup> Anam daate bia Nadi Nug do imu ele meum. Danab ag Nai Ena mehuqteb ele amu, danab amu ag danab ah Nai Ena amu dooteb ele amu, ag ahilagpanu enulag keeke, bedulag ehanidkunu, aoglag.

<sup>15</sup> Do anam daate amge da do amupa da keeke laa ii aomi. Amu da nai imu yaatem amu, da amupa keeke aokulnu ii hetem. Iitanab! Keeke da ehanidkunu, keeke amu da daka epelpa hein aotem amupa da daka da binal dootem amu danab laa nug heeb, binal amu iita melo am ena iitanab iita. Am naunab. Da mauhlom am nau anam iita. Da dahil gamag ahak dootem imu, danab laa nug gamag ahak dahil imu diig, amu dahilpanu

ada adila aokunu am ena iitanab. <sup>16</sup> Da Nai Ena mehuqtem ele amu, amupa da daka binal mekulnu elele iita. Adinu? Kayak Nug a, da hetem. Da ii mehuqlom amu da ug nadi doolom. <sup>17</sup> Am da daka doominu ahe, udat imu heinnelob am da udatnu nob aolom. Amge da udat imu hetem ele amu, da daka ain ii hetem. Iita, Kayak Nug udat imu hekulnu medom amunu <sup>18</sup> da nob adi aokul? Dahil nob ena amu inam. Da Nai Ena mehuqtem, udat amupa da keeke da aokulnu elele daatem amu da ii awen, da Nai Ena, hamu nob laa iitapa mehuqe, danab madaatem.

<sup>19</sup> Da danab laa nug he, begbeg danab nuhig ii daatem. Iita! Amge da danab kudum eedapi, ag Jesus dim lamidkulagnu hetem amunu da daka danab oh dilag begbeg danab daakulnu ool he daatem. <sup>20</sup> Amu da oiyeye uke, Juda danab gumate uke amu da Juda danab bein, ag daateb bia daami. Ag diikulnu amu da do waapa ii daami amge ag amelagpa da anidpig amu da do dim lamite daatem bia daami. Amupa da danab do waapa daateb ele, ag oolag edueb, ag Kristus dooglagnu hetem. <sup>21</sup> Aria da uke, danab do iita ele, da ag gumate uke amu ag amelagpa anidkulagnu da danab do iita ele bia daami. Da danab do iita ele amu diikulnu anam hemi. Amge da Kayaknu do amu ii qe edidmi. Iita, da Kristusnu do amu dim lamidmi. <sup>22</sup> Amu da danab gagatag iita oolagpa dayeye amu da danab gagatag iita bia daami. Da danab gagatag iita amu diikulnu anam hemi. Da am danab oh ag ahilag kobol aten atenpa oiteb amu da ag diilag amu awe, ag edue diikulnu udat kudum heinne daatem. <sup>23</sup> Am Nai Ena amu aha okai mekunu, da nai amupan

ititak aokulnu ele, da udat anam anam hetem.

<sup>24</sup> Danab ag qaibad gona, nug edid edid heteb ele amu, ag oh qaibad goteb amge danab laipuib nug nob ena aote amu ag iite dooteb? Aria ag ele qaibad gonana, laih laih aib neegpig. Iita! Ag nob ena aoglagnu aakuib dab menana qai eteg!

<sup>25</sup> Amu danab oh ag qid laala ele hekulagnu daateb amu ag wan imupan keeke o kobol laala, ag qid ena hekulagnu ib oo nete ele amu, ag amu oh qeeg nete. Danab amu ag wannu bala, keeke nauhte ele amu aoglagnu hena, qid amu anam heteb amge ig nob ena, nauhaknu elele iita, amu aognignu hetem. <sup>26</sup> Amunu da daka qaibad gotem amu da ugeke, edue laih laih neekeke ii gotem. Iita, da amel amu tutuku neeki uke, nob ena aokulnu daate amu andete gotem. Da danab laa nug epeg bitaka, laa makudkunu he, epeg nug eta, laih laih uke, ulahib ii ote amubia da ii hetem. Iita. Da udat dahil tutuku hetem. <sup>27</sup> Genab da daka da bedul qei ne, dab mak da ool unuqagpa daate aakuib da bedul dim lamidte. Anam ii hewoya am da Nai Ena danab laaib dooglagnu mehuqeqe, dimpa da padal mekul am ena iita.

## 10

### *LAA OO EEDAKPA NA QEMANU NAI*

<sup>1</sup> O lailad, ig alankad ag keeke anidpig ele amu, da ag amunu dab mena oiglagnu ool daate. Ig alankad adi ag lombig waapa oinna, ag baelagpa le kokod matadpig. <sup>2</sup> Ag oh Mosesnu dim lamitak danab bena, ag nug waapa daanna oipig. <sup>3</sup> Ag oh amu Kayak Nug ag bret mate lapig. <sup>4</sup> Ag oh amu, Kayak Nug le mate lapig. Ao, hab atannu laa Nugib

ag omalatom. Nug Kristus. Nug he lapig. <sup>5</sup> Amge Kayak Nug danab ah kudum ag ahilagu ehed hak nau amu andata, amupa Nug ahilagnu oo elele ii dayom amunu Nug he, ag atu tadakpa mauhpig.

<sup>6-7</sup> Am keeke imu oh, ig anidta doognignu, dotog bia, ig keeke nau Israel amelag qe hepig bia amu ig amenig ii qemanu, ig Israel oolagpan danab laala hepig bia amu ig kayak ham bupuak ii dim lamidmatanu beum. Kayak naipa, nai amunu inam daate. “Danab ah ag ahan, kayak ham bupuak binag mena, qag mena daanna, hobul nadi hena lanana, ahan nuhignu ahi ele godapig.”

<sup>8</sup> Gapai kobol, Israel oolagpa laala hepig bia amu ig ii hemata. Ag kobol amu hepig amunu ded laipupa 23,000 ag mauhpig. <sup>9</sup> Ig Kayak Nug keeke hekunu aum amu genab hekute o iitate amu doognignu, Israel oolagpa laa hepig amubia, ig Kayak ii eedmata. Ag oolagpa laala ag anam heeg, mat ag emalatete mauhpig. <sup>10</sup> Amu ig Kayaknu naitud, Israel oolagpa danab ah laala hepig bia ii hemata. Ag Kayaknu naitud nai matieg amu aqakunu engel nug aqe, padal mepig.

<sup>11</sup> Keeke imu oh amu ig anidta doognignu beum. Kayaknu yak oopa kaya amu yaaladpigi daateb amu ig danab gogtak haen imupan, ig anid tata, dab mak aota oignignu ipunigte <sup>12</sup> amunu danab laa nug gagatag hibaita daate dab mete ele amu, nug na qemanu dab ma auta awad! <sup>13</sup> Ehed haknu eedak laanab amu ag bedulagpa ii bete. Iita. Danab oh aoteb amuib. Amu Kayak Nug hanhan ehanigte amu Nug ehed haknu eedak haenpa ele ehanigku. Ehed haknu eedak amu na edidmanu

Kayak Nug na ehanita, ehed haknu eedak okainab, na edidkunu elele, amu bemanu amu Nug aib aku. Ge! Haen na ehed haknu eedak aotem ele amu, haen amunab Nug na ehed haknu eedak waapa daamnau gagatag medaku.

***KAYAK GENAB, HAM BUPUAK ELE OH DIMLA-MATAKNU ELELE IITA***

<sup>14</sup> Anam daate amunu o lailad, ag kayak ham bupuk kobol amu aib adapig. Ag uueg! <sup>15</sup> Ag doyak ele amunu da ag amelagpa atem, dahil nai amu ahilag dab makpa ag aka epedin anteg! <sup>16</sup> Ig e gun latem haenpa amu ig wain, ititak megte ele amu, ig amu lautut, amupa ig Kristus ele iite ou qetem? Amu bret laipu panaut ne, panit lautut, amupa ig Kristus ele iite ou qetem? <sup>17</sup> Bret laipuib daate amu ig danab ah kudum amupa bedunig laipu daatem. Adinu? Ig oh am bret laipu amuib latem.

<sup>18</sup> Israel budub, danab amu ag heteb amu dab mekulag. Israel ag dod tepu main Kayak medteb amu ag amu lanana, ag Kayak ele laipu qag mak daateb. <sup>19</sup> Nai imupa amu da aditai atem? Da dod mana, kayak ham bupuk dotog metak am keeke genab atemte? O kayak ham bupuk dotog, nug am keeke genab atemte? Da anamte atem? <sup>20</sup> Iita, amge iita adi ag mana metak ahilagpa amu ag dod main oudi nau medateb. Ag main Kayak ii medateb amu da ag oudi nau ele ou qak daaglagnu amu, da ool ii daate. <sup>21</sup> Ag Kristus amu oudi nau ele ou qak daaglagnu elele iita amu ag Kristus, oudi nau ele laipu daaglagnu elele iita. <sup>22</sup> Ig anam heput amu



Nadi Kristus Nug ig ele ou qak daagnignu wagai mekute? Ig nuhig gagatag amu edidkunignu elelete?

*KRISTEN NUG HAEN OH KAYAK BINAG MEKU*

<sup>23</sup> Genab, Kayak ig keeke hekunignu ib babaitom daate amu ig hekunignu elele amge keeke oh ig ii ehanigteb. Keeke amu oh amu ig hekunignu elele amge keeke oh amu hepeg, ig gagatag ii daamta.

<sup>24</sup> Danab laa nug nukā nuhignuib aib dab meum. Iiṭa, nug danab oh ag ena daaglagnu amu nug ag ehanatad!

<sup>25</sup> Ag dod tepu oh daden lagpanu daden mekulag amu ag aon laig! Ag danab oopanu ulum ahilag dab menan, diig doon lakulagnu aib od madapig.

<sup>26</sup> Adinu? Wan imu amu keeke oh ele niite imu am Kayak nuhigib daate.

<sup>27</sup> Laa amu danab laa, nug Jesusnu oopa genab ii doote ele amu, nug ag gopeg, nug laugpa oh e lakulagnu onilagpa eeb amu ag gokulagnu oolag dayeb amu gokulagnu elele. Gopeg, keeke oh nug mateb amu lakulag. Diig doon lakulagnu aib od medapig.

<sup>28</sup> Amge danab laa nug ag amelagpa, “Ag dod tepu imu main kayak ham bupuak medapig,” ab, aria danab nug amelagpa aum amu ag nuhig oopanu ulum nauhmanu ele dab mena, dod amu aib lapig.

<sup>29</sup> Da danab amunu oopanu ulumnu atem. Ahilagnu iita. Da anam atem amge ag oolagpanu laa nug inam aku. “Ehe, adinu da danab laanu oopanu ulum nauhmanu dab mein, e lakulnu elele dootem ele amu, da ii lapa?” <sup>30</sup> Da dod tepu amunu da Kayak unuqite lapi amu danab laa nug adinu dahilnu nai ehed aku? Da e amunu

Kayak amegpa, ‘Ena hen medame,’ awoya lateḡem,” awa aku.

<sup>31</sup> Amu genab amge ag e le ele lakulag, o keeke laa hekulag amu ag keeke amu ohpa ag Kayak binag mekulagnu aakuib dab menan heig! <sup>32</sup> Ag Juda danab, Grik danab amu Kayaknu kristen tamaniak dilag ele dab menana, danab ah amu ag ag anadna, kobol ahilagpa ag nena qemananu ag tutuku daan oiyeg! <sup>33</sup> Da hetem amubia ag heig! Da keeke oh hetem amu danab oh ag da adi hetem amu oolag metaglagnu hetem. Da udat hetem amu daib ehanidkulnu ii hetem. Iita! Da udat hetem amu danab ah kudum ehanadpi, Kayak edua diikunu aakuib hetem.

## 11

<sup>1</sup> Am da Kristus Nug kobol adi adi heum ele amu andete, da kobol amu dim lamidtem, amubia ag ele da anidnana da hetem bia heig!

### *KAYAK BINAG MAK HAENPA IKI HAUTAK KOBOL*

<sup>2</sup> Ag hanhan dahil dab meteb, nai da ag amelagpa atem ele amu, ag tutuku aon adateb amunu da ahilagnu ool ena dayeye, ag am genab kobol ena heteb awe atem. <sup>3</sup> Amge ag nai imu dooglagnu da ool daate. Danab oh ikilag am Kristus, ah iki am danab, Kristus iki am Kayak. <sup>4</sup> Anam daate amunu danab nug unuqidkunu o iita nai mehuqkunu haaha, iki haut-te, nug aaku Kayak aben mekom daate amu kakidte. Aben amuam danab nug Kristus waapa daate. <sup>5</sup> Am ah laa nug iki ii hauta, unuqidkunu o Kayak nai mehuqkunu haaha, nug ele Kayak aben mekom daate amu

kakidte. Aben amuam ah nug danab waapa daate. Nug iki ii haut-te amu ah nug iki udug oh hoite bia hete. Am uda nak ele. <sup>6</sup> Amu ah nug iki hautaknu uute amu nug iki udug hoiad! Amge nug iki udug hoiyaknu uda nak doote dayeb amu aria nug iki hautad! <sup>7</sup> Aria danab nug iki amu aib hautom. Am adinu? Danab ag Kayak adi bia daate amu nuhig gagatag ele dotog bia daateb amge ah ag danab adi bia daateb amunu dotog daateb amunu ag ikilag haute! <sup>8</sup> Kayak Nug ah bedupa danab ii heum. Iita. Nug danab bedupa ah heum. <sup>9</sup> Am ele Kayak Nug ahnu dab ma, danab ah ehanidkunu ii heum. Iita. Nug danabnu dab ma, ah nug danab ehanidkunu heum. <sup>10</sup> Kayak Nug ah, danabnu heum amunu ah ag engel noolagpa ena daaglagnu ikilag haute!

<sup>11</sup> Amge ig Nadi ele ou qak daatem ele amu, ihinigpa ah nug nuka pide ii daate. Danab nug ele nuka pide ii daate. Iita. Ah nug danabnu ehanitak aote, danab nug ahnu ehanitak ele aote. <sup>12</sup> Kayak Nug ah hekunu amu Nug danab bedu laih awa heum anamib gemu danab ahpa doteb amge Kayak Nug keeke oh Mameg daate. <sup>13</sup> Ag imu tutuku epedin anteg! Ah laa nug iki ii hauta, Kayak unuqidte amu nug kobol tutuku hetete? <sup>14</sup> Am Kayak Nug ig danab ah bedunig aben aben mekompa daagnignu anidtem am danab laa nug iki udug elab ele daate amuam ehed iite ipunigte? <sup>15</sup> Amge ah laa nug iki udug elab ele oiku amu ena, am nuhig bala. Adinu? Kayak Nug ah iki udug elab heum amunu amupa nug iki haut-te. <sup>16</sup> Amu danab laa nug nai imu tapeb neeb, awa awa qetak

nai maṭiaya hete amu nug doyaḁ! Ig kobol amunu ḁo laa ii meṭem, Kayaknu kristen tamaniak oopa ele anamib daaṭe.

### *E GUN LANAKNU KOBOL TUTUKU*

<sup>17</sup> Aria da keeke laanu madikulnu hetem amu da amunu binalag ii meṭem. Am inam. Ag ahi eṭaglagnu qag menana amu ag kobol tutuku ii aḁateb. Danab ag qag mak amupa ehanitaḁ aolob amge iita, ag nakok ehed bia aoteb. <sup>18</sup> Amu laa ag haen ag Korint ag Kayak nai dooglagnu qag meṭeb amu ag obatak obatak daaṭeb, laipu oh ii daaṭeb, anam aeg doomi amu da nakok oolpa genab dooṭem. <sup>19</sup> Adinu? Ag enanag ii heteḁ amunu obatak amubia genab beku amge amupa Kayak Nug heeb, ag oolagpa danab aun aḁi ag tutuku daaṭeb ele amu, ag miag atiglag. <sup>20</sup> Ag anam daaṭeb amu haen ag oh qag meṭeb amupa ag, “Ig Naḁinu e lateḁ,” aon aṭeb amge ag anam ii heteḁ. <sup>21</sup> Iita! Ag oh aka aka ahilag e aka lateḁ amunu laa e iita ele daaṭe amu, nug enug dayeye, aria danab laa nug le gagataḁ huan lawowa kaaka qeṭe. <sup>22</sup> Amu aṭemu? Ag e le ele lakulagnu laulkad iitate? Ag Kayaknu kristen tamaniak amu keeke hamu bia dooṭebte? Ag lailkad laala, e iita ele daaṭeb amu, ag ag anadna ahilagnu dab mak ii aona, uḁa nak madatebte? Ag heteḁ amu da amunu aḁi akul? Da ag binalag mekulṭe? Iita! Kobol amunu amu da ag binalag iinab mepa.

<sup>23</sup> Da nai imu Naḁi Jesus Nug odepa nai awen, da ag amelagpa tatam ami amu da gemu eḁuen baula aṭem. Nai amuam inam. “Judas Nug tuḁan Naḁi Jesus awa, keked epelagpa meum, tuḁan amupa

Nadi Jesus Nug bret awa <sup>24</sup> Kayak unuqitowa, pane ne amu Nug aum. ‘Bret imu amu da bedul ipunigte. Amupa da ag ehanadkul. Da ag ehanadkulnu hemi, amu ag daulagpa dokunu, ag bret, ig gemu late, amubia laig!’ <sup>25</sup> Ag e lana malona amubia Nug hai gokod awa, Nug aum. ‘Hai gokod imupa wain daate amu da tiil ipunigte. Da tiilpa Kayak Nug tituanak bau qagate. Ag lanana amu da ag ehanadkulnu hemi, amu ag daulagpa dokunu ag wain, ig gemu late, amubia laig!’” Jesus Nug anam aum. <sup>26</sup> Amu genab, ag hanhan Jesus edua ii nak haen imupa, bret imu wain imu ele lanana, ag Nadi Jesus mauhomnu nai amu mehuqteb.

<sup>27</sup> Amunu danab laa nug oo babaitak iita, nug Nadinu bret o wain hamu awa late amu, nug amupa Nadi Jesus bedu, tiig ele am keeke hamu bia doya, nug Jesus nuhigpa hipunin hete. <sup>28</sup> Danab nug nuka epedita antowa aria nug Nadinu e gun ele amu nug laku. <sup>29</sup> Adinu? Danab nug nuhig oiyak elele iitapa, Nadi Jesus bedu tiig ele amu dab ii medata, nug hamu late amu nuka nuhig ab aaku late. <sup>30</sup> Diig amupa ag oolagpa danab ah laala ag gagatag iita, laala ag ode aona, laala mauhadpig. <sup>31</sup> Ig ika ig epedita, elele anidta lakunig am bedunigpa ab iita daagnig. <sup>32</sup> Amu Kayak Nug ig adi hetem anika, Nug ihinig hak amu epedita, ig danab Kayak ii dim lamidteb ele oh padal ii mematanu, ig ena bekunignu Nug ig tolika, bu iqaqa bapaigte.

<sup>33</sup> Anam aaku amunu o dahilad, ag e lanaknu qag meteb, ag aka aka aib e paha lapig. Laala udiglagnu amelag meig! <sup>34</sup> Ag mauhnoak e lateb

amubia tudidna labepeg, Kayak epediak baubau matamanu amu laa nug enug qeeb, nug nuka nug laugpa e lanad! Nai imu gogpa ii temi amge dimpa da uke, apa bapaidkul.

## 12

### *KAYAK OUDI NUG EHAH DIIGDIIG KRISTEN MADATE*

<sup>1</sup> Aria keeke laa imu ele iiku yaakulnu hetem. O lailad, Kayak Oudi Nug udat diigdiig haknu ehah megte amu da ag amunu oolag maidkunu ool daate. <sup>2</sup> Ag dooteb, anuka ag Kayak ii doon daaegeg, haen amupa Satan eedate, ag kayak ham bupuak, ag nai ii maditeb ele amu, ag binag mekulagnu oolag yaaegeg, ag amu dim lamadna gokulagnuib hepig. <sup>3</sup> Amunu gemu keeke amubia baula bemanu, ag imu dooglagnu da ool daate. Kayak Oudi Nug danab laa oopa noa heeb, nai mehuqa, “Jesus Nug nob nau aokunu ool daate,” madikunu elele iita. Aria danab laa, nug oopa Kayak Oudi iita ele amu nug Kayak binag ma, “Jesus Nug Nadi daate,” madikunu ele elele iita.

<sup>4</sup> Kayak Oudi Nug udat diigdiig haknu ehah amu megte amge Kayak Oudi laipu, Nug aakuib daate. <sup>5</sup> Nadinu udat diigdiig amu ig hekunig amge Nadi laipu Nugib daate. <sup>6</sup> Udat diigdiig, amu haknu ib pide pide ele daate amge Kayak laipu, Nugib udat amu haknu gagatag danab oh ag udat amu hekulagnu madate.

<sup>7</sup> Danab ah ag tamaniak oopa daateb ele amu, ag nug ehaniak hekulagnu, Kayak Oudi amu Nug ehah diigdiig danab anen anen madate.

<sup>8</sup> Kayak Oudi Nug danab laa nug ag dab mak

ena ipuanadkunu ehah medata, Kayak Oudi laipu amuib Nug danab laa nug Kayaknu nai mehuqeb, danab ah tutuku dooglagnu ehah medate. <sup>9</sup> Am Kayak Oudi laipu amuib Nug laa nuhig oopa genab doyak okai medata, laa nug ode danab heeb, ena daaglagnu ehah medate. Oudi laipu amu Nug hete. <sup>10</sup> Am Nug laa ehah mete, nug kobol danab hekunu elele iita ele amu nug hekunu elele daate. Laa nug Kayak nai mehuqkunu ehah amu medate. Am laa nug oudi diigdiig epediadkunu ehah amu medate. Am laa nug nai laapa nai madikunu ehah medata, Nug laa nug nai amu edukunu ehah amu medate. <sup>11</sup> Kayak Oudi laipu amuib Nug doyak ena amu oh he bete. Nug oo daate bia danab anen anen adi hekulagnu ehah amu madate.

### *TAMANIAK AM BEDU LAIPU BIA DAATE*

<sup>12</sup> Ig danab bedunig amu laipu amge laih kudum daate. Am bedu laih kudum amu ag oh qag meeg, bedu laipu daate. Kristusnu tamaniak ele nug anam aaku daate. <sup>13</sup> Kayak Oudi Nug he, ig oh bedu laipu bia daatem. Laala am Juda danab, laala am iita adi danab. Laala am begbeg danab, laala am begbeg iita. Yo ig oh Kayak Oudi Nugib aomut.

<sup>14</sup> Aria danab bedu nug am laih laipuib iita! Laih kudum ag daaegeg, bedu nug daate. <sup>15</sup> Baeg nug, “Da am epeg iita amunu da bedu imunu laih laa iita,” alo amu, amunute nug am bedu amunu laih laa iite daalo? <sup>16</sup> O iita daug nug, “Da am ameg iita amunu da bedu imunu laih laa iita,” alo amu, amunute nug am bedu amunu laih laa iite daalo? <sup>17</sup> Bedu laa oh nug amegib daalo amu nug nai daugpa atem doolo? O iita bedu laa oh nug daugib

daalo amu nug a<sub>tem</sub> u<sub>dig</sub> doolo. <sup>18</sup> Amge anam i<sub>ita</sub>. Kayak Nug oo niom bianab be<sub>du</sub> laipupa be<sub>du</sub>pan laih naunau diigdiig ele ha<sub>tom</sub> daa<sub>te</sub>b. <sup>19</sup> Be<sub>du</sub>pan laih naunau ag laala ii daalob amu be<sub>du</sub> laipu ii daalo <sup>20</sup> amunu be<sub>du</sub>pan laih naunau ag qag meeg, be<sub>du</sub> o<sub>kai</sub> laipu daa<sub>te</sub>.

<sup>21</sup> Amunu ameg nug e<sub>peg</sub>nu, “Da da<sub>ka</sub> am elele. Na da ehanid<sub>kut</sub>nu u<sub>dat</sub> laa ii daa<sub>te</sub>,” ii ama. I<sub>ita</sub>. I<sub>ki</sub> ele nug baekud dilah, “Da da<sub>ka</sub> am elele. A da ehanid<sub>kul</sub>ahnu u<sub>dat</sub> laa ii daa<sub>te</sub>,” ii ama. I<sub>itanab</sub>!

<sup>22</sup> Amu ig be<sub>du</sub>nigpa laih laala am gai i<sub>itanab</sub> anad<sub>tem</sub> amge laih amu ag ii daalob amu ig u<sub>dat</sub> laa ii helom. <sup>23</sup> Amu ig be<sub>du</sub>nig laih laa, nee<sub>kak</sub> enanag i<sub>ita</sub>, ig ag ahilag u<sub>dat</sub> he<sub>te</sub>b amupa binalag me<sub>tem</sub>. Amge ig be<sub>du</sub>nig laih laa, nee<sub>kak</sub> ahilag enanag ele amu, ahilag u<sub>dat</sub> hak am o<sub>kai</sub> i<sub>ita</sub>.

<sup>24</sup> Anam a<sub>ku</sub> amu amupa ig anid<sub>tem</sub>, Kayak Nug be<sub>du</sub>nig laih oh binalag ma<sub>tom</sub>. Laa nee<sub>kak</sub>nu, laa u<sub>dat</sub> haknu amunu amupa ig be<sub>du</sub>nig laih oh am tu<sub>ditak</sub> laipuib daanna, u<sub>dat</sub> elele he<sub>te</sub>b. <sup>25</sup> Amunu be<sub>du</sub> laipu nug otiak laala ii daa<sub>te</sub>b. I<sub>ita</sub>, laih naunau oh ag nug ehanidnana daa<sub>te</sub>b. <sup>26</sup> Be<sub>du</sub> laih laa nug gui<sub>tak</sub> doye amu be<sub>du</sub> laih laa oh ag ele gui<sub>tak</sub> a<sub>ote</sub>b. Be<sub>du</sub> laih laa nug onig ena ele daye am be<sub>du</sub> laih laala oh ag ele oolag gamag a<sub>ha</sub>te.

<sup>27</sup> Ag oh amu Kristus be<sub>du</sub> daa<sub>te</sub>b, danab anen anen ag amu Nug be<sub>du</sub> laih naunau daa<sub>te</sub>b. <sup>28</sup> Am Kayak Nug kristen tamaniak oopa nuhig u<sub>dat</sub> hak danab ele anam a<sub>ku</sub> meum. Anu<sub>qak</sub> am total danab daa<sub>te</sub>b. Amu dimulagpa am Kayak nai mehu<sub>qak</sub> danab daaeg, ag dimulagpa am ipuni<sub>tak</sub> danab daa<sub>te</sub>b. Aria laa amu kobol danab he<sub>kunu</sub> elele i<sub>ita</sub> ha<sub>k</sub> danab daaeg, laa amu ode babai<sub>tak</sub>



danab amu ehanatak danab amu udat diigdiig gumak danab daaeg, laa amu ab ab naipa nai matiaknu danab daateb. <sup>29</sup> Ag oh total danab daatebte? O iita ag oh Kayak nai mehuqak danabte? O iita ag oh ipunitak danabte? O iita ag oh am kobol danab hekunu elele iita hekulagnu elelete? <sup>30</sup> O iita ag oh am ode danab bapaidkulagnu ehah elelete? O iita ag oh am ab ab naipa nai maditebte? O iita ag oh am nai amu edutebte? Iita! <sup>31</sup> Amge ag ehah meu ena ele amu aoglagnu oolag dayeb, wagai mena hena aweg!

### *OONIG MAUHAKNU KOBOL*

Amu oh am ena amge da geha iiku ib enanag ipuanadpi dim lamidkulagnu hetem.

## **13**

<sup>1</sup> Da danab amelagpa danab nailag diigdiig amu engel nailagpa ele maditem dayeb amge da laa dilagnu oo mauhak ii dootem dayeb amu da do diigdiig hamu gaateb bia o iita oqoti hamu ote bia daatem. <sup>2</sup> Amu da propet nai madikulnu, Kayaknu dab mak lokumak amu dab mak laala ele dookulnu elele daatem dayeb, dahil oopa genab doyak gagatag dayeb, amupa da qauko hepi, laih wakunu ele hekulnu elele daatem dayeb amge da laa dilagnu oo mauhak ii dootem dayeb amu da keeke hamu bia daatem. <sup>3</sup> Am da keeke dahilad oh dadek danab matoya, da Kayaknu udat huan heina, da daka da binal mekulnu da bedul imu kakidtem dayeb amge da oo mauhak, laa dilagnu ii dootem dayeb amu, keeke amu oh da ehanidkunu elele iita.

<sup>4</sup> Danab nug oo mauhak ele, nug laa dilagnu paha ehed ii doote, nug laa ele ehanadte. Nug

danab laa keeke kuḍum ena ele daye anta, nuhignu oo ii nauhte. Nug nuḱa onig ii humate, nug enaen ma ele ii oite. <sup>5</sup> Danab nug oo mauhak doote ele, nug laa noolagpa dagom oite, nug nuḱa nuhignuib ii dab mete. Nug paha opodi ii bete, nug laa ag nuhigpa ehed laa hepig amunu hanhan ii dab mete. <sup>6</sup> Danab nug oo mauhak doote ele amu nug kobol tutuku iitanu amu nug oo gamag ii ahate. Iita, nug Kayaknu kobol genab, amunuib oo gamag ahate. <sup>7</sup> Danab nug oo mauhak doote ele amu nug ug oh maote, nug hanhan oopa genab doyak ele oite. Nug hanhan Kayak nug ehanidkunu amu dab mete. Nug ug laa maokunu amu ug ii qete, nug gagatag hibaita daate.

<sup>8</sup> Am oo mauhak kobol amuam geha iita ii mema. Iita, nug hanhan daaku! Kayak nai mehuqak udat amu geha iita meku, nailag diigdiig matiaknu udat am geha iita meku. Amu doyak awaknu udat am ele iita meku. <sup>9</sup> Gemu ig keeke laipu laipu dootem am Kayak nai ele amu laib laib aakuib doot mehuqttem <sup>10</sup> amge dimpa kobol amuam iita meeb, meu amu geha miagib udiḱu. Haen amu dob am keeke oh ig ii dootem ele amu, keeke amu oh miag atieb ig doognig. <sup>11</sup> Amu haen da nid nakok dayeye, da nid naunau dilag nai matimi. Nid naunau keeke dab medateb anam da dab metami. Da nid naunau dilag dab makpa ele daami. Amge dimpa, da danab okai mein, da nid nakok dilag kobol amu oh da editen, danab okai dilag dab mak amu da awen daatem. <sup>12</sup> Anamib gemu da Kayak baegpa daye, Nug atem daate anidkulnu amu da nuhig kobol amu laih nakok nakokib, ig keeke letod ena iitapa anidtem, amubia

ante dootem, oh ii dootem. Dimpa gogtak haenpa amu da Kayak atemnab daate anidkul. Gemu Kayak Nug dooidte amubia da haen amupa keeke dookul. <sup>13</sup> Amunu ib ewam imu daateb, oopa genab doyak kobol amu Kayak waapa dayaya ameg mak kobol amu laa dilagnu oo mauhak kobol ele aaku. Amge ib ewam amu oh dilagnu ib anuqaknab daate, amuam laa dilagnu oo mauhak kobol.

## 14

### *KAYAK OUDINU EHAHNU NAI LAA*

<sup>1</sup> Oo mauhaknu kobol anam daate amunu ag hanhan danab ah laa dilag oolag mauhkunu wagai menana, aria Kayak Oudinu ehah oh amu ag aoglagnu oolag dayad! Amge ehah anuqak amu ag Kayak nai mehuqaknu amu aoglagnu wagai meig! <sup>2</sup> Adinu? Ig dootem, danab nug nai laapa nai madite, nug danab ah ele nai ii madate. Iita. Danab ag nai amu ii dooteb amunu nug Kayakib amegpa ate. Kayak Oudinu gagatag he, nug nai lokumak madite. <sup>3</sup> Amge danab nug Kayak nai mehuqte, danab amu nug nai matieye, danab dilag oopa genab doyak gagatag qedate, kobol ena dim lamidkulagnu gagatag madate amu ag oolagpa madod daakunu gagatag ele madate. <sup>4</sup> Danab nug nai laapa nai madite, nug nuka oo gagatag medate. Amu danab nug Kayak nai mehuqte, nug kristen tamaniak, ahilag oopa genab doyak amu gagatag qedate. <sup>5</sup> Ag oh ab ab nailkad laalapa nai matiglagnu ool daate amge ag Kayak nai mehuqkulagnu amu da ool huana daate. Danab nug nailkad laalapa nai madite ele amu, nug

danab Kayak nai mehuqte ele amu ii edidte. Iita. Nug nai amu kristen tamaniak ag oolag gagatag gedakunu edueb, nug Kayak nai mehuqak danab bia daaku.

<sup>6</sup> O lailad, nai imu ag tutuku dab metan adeg! Da ag gumate uke, nailkad laalapa nai madakul amu da ag atem ehanadkul. Iita amge da nai ag dooteb ele amu, nai amupa Kayak Nug da nai adi amelagpa akulnu ipunidom amu api dooglag, o iita doyak ena ag madakul, o iita da Kayak nai mehuqe ib ena ipuanadkul, o iita da ipunitak nai api dooglag amu amupa da ag ehanadpi, ag Kayak tutuku dooglag. <sup>7</sup> Keeke bau iita, oqoti ote, dumutum o iita gita keeke, nuhig baag ena ele amge oqoti ena diigdiig ii heeb amu ig oqoti ena atem doolom? <sup>8</sup> Amu biugal baag ena ii gayeb am aun nug aha, ban hekunu bapaidku? <sup>9</sup> Amubia ag ele nailkad laalapa nai madipeg amu laa ag atemun geha ahilag nai amu dooglag? Iitanab. Nai ag matiglag amu aun dooku? Laa iita. Qetodku. <sup>10</sup> Genab, danab nainig pide pide kudumnab wan imupa daate. Nai amu oh oopa amu laa nug hamu ii daate, nai amu oh amu diig ele. <sup>11</sup> Anam daate amunu aria danab laa nug nai laa da ii dootem elepa da amelpa nai matieb, da ootot daapi, nug dahilnu, “Danab umu am ab laa ted,” awa aku. Da ele geha nuhignu, “Nug am ab laa ted,” akul. <sup>12</sup> Amu ag ele anamib, amu ag ele Kayak Oudinu ehah aoglagnu oolag huana daate amunu Kayak Oudi Nug ag kristen tamaniak gagatag madakunu ehah amu ag madakunu wagai meig!

<sup>13</sup> Diig amupa amu danab laa nug nailag laapa Kayak nai mehuqte amu nug Kayak gagatag meteb,

nug nai amu edukunu elele daakunu unuqitad!  
 14 Ag imu dab menan autna aweg! Da nailag laapa  
 nai amupa unuqidtem dayeb amu da oudil aakuib  
 nug unuqidte. Am dab mak dahil amu hamu  
 daate. 15 Amunu da atem hekul? Da unuqidkul amu  
 da oudil, dahil dab mak ele ohpa unuqidkul. Da ahi  
 edakul amu da oudil dab mak ele ohpa ahi edakul.  
 16 Na anam ii hena, oudinpaib nai laapa, Kayak  
 unuqidna, “Ena heme,” abepe amu danab laa  
 nug am atemun unuqitak nahip gagatag qedaku?  
 17 Na heme am genab, na Kayaknu ena heme  
 aon, amegpa anana, binag meme amge na heehe,  
 danab laa nug Kayaknu ehanitak, ig ehanigte amu,  
 nug ii doynom.

18 Da haen kudum nailag laalapa, Kayak binag  
 metem. Da kobol amu okainab hein, ag edadtem.  
 Da anam hetem amunu da Kayak amegpa, “Ena  
 heme,” awe atem. 19 Da anam hetem amge kristen  
 tamaniak qag makpa amu da nai onig tanig elepa  
 nai madipi, danab ag oolag maiteb, meu aoglag am  
 enanag. Amge da nai onig 10,000 nailag laapa nai  
 madipi, danab ag nai amunu meu ii aoglag am ena  
 iita.

20 O lailad ag dab maknu amu, ag nid naunau,  
 dab mak tutuib aon oiteb, amubia ag aib oipig  
 amge ag hipuninnu amu ag nid yud, hipunin  
 doonna ii heteb, amubia ag hipunin aib hepig. Ag  
 danab okai dilag dab mak aon oiyeg! 21 Kayaknu  
 do naipa nai imu daate. “Da laihnu danab, ag  
 nailag laa, Israel ag ii dooteb ele amu, da danab  
 amu maadpi ag Israel gumadna udina, ag ag  
 odelagpa nai madakul amge amupa ele Israel ag

dahil nai ii doomna,” awa aum.

<sup>22</sup> Amupa ig dootem, danab laa nug nailag laapa, oopa genab doyak danab ehanadkunu ii daate. Iita. Kobol amuam danab ag oolagpa genab ii dooteb ele, ag danab anam hete ele, amu anidna doona, ag oolag edukunu daate. Amge Kayak nai mehuqak amuam danab ag oolagpa genab dooteb ele, ag gagatag aqakunu daate, oolagpa genab ii dooteb ele gagatag aqakunu iita. <sup>23</sup> Anam daate amunu kristen tamaniak danab ah oh ag qag mena, ag nailag pide pidepa nai madipeg, danab laala ag oolag ii maidte o iita ag oolagpa genab ii dooteb ele amu ag ahilag qag mak oopa nona anadna, ag, “Ag kaaka aqom,” aon akulag. <sup>24</sup> Aria ag oh Kayak nai mehuqpeg, danab laa nug oopa genab ii doote, o iita nug oo ii maidte ele amu, nug qag mak oopa nob, ag oh ahilag nai amu danab amu oopa noa dayaya heeb, geha danab amu nug am hipunin danab daate doyeb, ag nai madipig ele amu, nug epedik. <sup>25</sup> Nai oh amu nug oopa noa, adi lokumom daate ele amu oh heeb, miag atieb amu geha nug dup noa, idu wanpa nob amu nug Kayak binag ma, nug odepa, “Genabnab, Kayak Nug ag oolagpa daate,” awa aku.

### *KRISTEN AG ATEM AHI ETAGLAG*

<sup>26</sup> Anam daate amunu o lailad, ag atemtai hekulag? Ag inam hekulag. Haen ag oh qag meteb, laa nug ahi etak udat heeb, laa nug gagatag aqaknu nai ipuanatebeb amu laa nug Kayak nai ipunitom amu mehuqku. Amu laa nug nailag laapa nai matiebeb am laa nug nai amu eduku. Ag keeke amu oh anam hekulag amge ag keeke

oh kristen tamaniak gagatag qekunu heig! <sup>27</sup> Am laala ag nailag laapa nai matiglagnu heteb, aria adit o ewam aakuib ag anam hekulagnu am elele amge ag oh haen laipu aib madipig. Iita. Laa tatam matieb, laa matiad! Am laa nug nai amu eduard! <sup>28</sup> Kristen tamaniak qag makpa laa nug nailag laapa nai matieb, laa nug nai amu edukunu ii dayeb amu danab nug nai madite ele amu, nug ode qamutad! Nuka Kayak eleib nai matied!

<sup>29</sup> Danab adit o ewam, ag Kayak nai mehuqak danab, ag anen anen nai mehuqpepeg amu, laa ag bia amu ag nai amu epedieg! <sup>30</sup> Am Kayaknu nai mehuqak danab laa nug hedep na dayeb, Kayak Nug nai ipuniteb amu nug hibaiteb, laa nug nai madite ele nug ode qamuteb, laa amu nug nai madiku. <sup>31</sup> Geha ag kobol amu hepeg, ag anen anen oh ahan, nai mehuqaknu elele daapeg, geha danab oh ag doyak amu aon, ag oh gagatag aoglag. <sup>32</sup> Kayaknu nai mehuqak danab ag am nai mehuqkulagnu nug meh qak ii hemananu, ag gagatag Kayak epegpa aon daateb. <sup>33</sup> Adinu? Kayak Nug heeb, ig mauhnoak daagnignu ii hete. Iita. Nug heeb, ig oo laipu, madod ele daagnignu hete amunu ag nug meh qak ii hemana.

<sup>34</sup> Kristen tamaniak qag mak laa ohpa ah ag nai ii maditeb, amubia ahilag kristen tamaniak qag makpa ele ah ag nai ii matimna. Ag odelag qamutna daaglag. Kristen tamaniakpa ah ag anuqak ii daateb, do ate bia ag waapa daateb. <sup>35</sup> Ah ag nai laa diig dooglag oolag dayeb amu aria ag laulagpa ahilkad danab od mataglag. Ah nug Kristen tamaniakpa nai mehuqku amu nug kobol elele ii hete.

<sup>36</sup> Amu a<sub>t</sub>emtai? Kayaknu nai diig amu ag Korint agte? Agibte aaku Kayak nai aopig, danab ah laala ag amu iitate? <sup>37</sup> Danab laa nug, “Da am Kayak nai mehuqak danab,” dab mete dayeb o nug, “Kayak Oudi Nug dab mak ipunidte,” dab mete dayeb amu aria nug nai da ahilagpa yaatem imu amu, nug amunu, “Nadinu do anam daate,” ele anad! <sup>38</sup> Aria danab amu nug nai imu dab ii mete<sub>b</sub> amu aria ig doognig, nug Kayaknu nai mehuqak danab iita.

<sup>39</sup> Amunu o lailad, ag Kayak nai mehuqkulag<sub>nu</sub> udat amu aoglag<sub>nu</sub> gagatag heig! Laa ele amu ag nailag laalapa nai matiglag<sub>nu</sub> aib do mepig <sup>40</sup> amge ag kristen tamaniak oopa, qag mak ahilag, nug ena elelenab daakunu amu ag tutuku heig!

## 15

### *KRISTUS NUG MAUHOWA EDUA HIBAITOM*

<sup>1</sup> O lailad, da ahilag dab mak, Nai Enanu, mad edakulnu hetem. Da tatam dig makpa Nai Ena amu mehuqe ipuanati, ag Nai Ena amu doon adan, amupa ag Kristus nuhigpa gagatag bepig daateb. <sup>2</sup> Ag da Nai Ena ag amelagpa mehuqmi ele amu, ag gagatag adateb dayeb amu Kayak Nug nai amupa ag edua diite. Ag gagatag ii adateb dayeb amu ag hamu oolagpa genab doopig.

<sup>3</sup> Da ipunitak aomi amu da nai amu ag amelagpa mehuqi doopig. Nai amu inam. Kayak naipa, nai daate amubia Kristus Nug ig oh ihinig hipunin uhuqa megakunu mauhom. <sup>4</sup> Ag Nug men ode modpa boomeg amu ded ewampa Nug Kayak naipa, nai daate bia, Nug edua hibaitom. <sup>5</sup> Amu Nug Petrus gumita uke ante, dimpa Nug



nuhikud ipunitak awak danab laa gumata uke anidpig. <sup>6</sup> Amu dimpa nug nuhikud dim lamitak danab 500 laa ele gumata uke anidpig. Gemu amu ag oolagpan kudum bau daateb amge laipu laipu mauhpig. <sup>7</sup> Aria amu dimpa Nug Jakobus gumita uke ante amu Nug total nuhikud oh gumata uke, ag ele Nug anidpig. <sup>8</sup> Aria da am nid yud anig dimnab menuom bia daaiyi, Kristus da gumida udie anidmi.

<sup>9</sup> Amu da total danab oolagpanu amu da onig iita bia daatem. Adinu? Da Kayaknu kristen tamaniak amu hepi, iita mekulagnu ehed hadmi amunu dahilnu danab ag, “Nug total danab,” aon akulagnu elelenab iita. <sup>10</sup> Amge Kayak Nug da ehanitak okai hamu mede, da gemu atem daatem amu ehanitak nuhig amupa aaku daatem. Nug da ehanitak okai hamu mede amu da bedulpa hamu ii qetodom. Iita. Da udat gagatag heinne, gemu ele hetem. Total danab laa ag da udat gagatag hetem bia gagatag ii heteb amge da daka ii hetem. Iita! Kayak Nug da ehanitak okai hamu mede, da amupa amu hetem. <sup>11</sup> Amge daibte udat okai hemi o iita total laa agte udat okai hepig, amuam keeke okai iita. Keeke laipuib anuqak daate am, ig oh Kayaknu nai laipuib mehuqtem, aakuib amu ag Korint danab amu ag nai amu ag oolagpa genab dooteb.

### ***DANAB MAUHPIG EDUA HIBAITAKNU NAI***

<sup>12</sup> Amge haen oh ig Kristus Nug mauhe, Kayak Nug he, Nug edua hibaitom, nai amu ig mehuqtem amunu atemun ag oolagpanu laala ag nai inam aon maditeb? “Danab mauhom, nug edua ii hipaidma,”

aon aṭeb. <sup>13</sup> Am danab mauhom, nug eḍua ii hipaidlo, nai amu genab daalo amu ig inam ele doolom. Kayak Nug he, Kristus Nug ele eḍua ii hibaiṭom amge anam iīṭa. <sup>14</sup> Kristus Nug eḍua ii hibaiṭom am genab dayeb amu aria nai ig mehuṭṭem am hamu, kaya naiib. Ag oolagpa genab dooteb ele amu, keeke amu ele am meu iīṭa, keeke hamu. <sup>15</sup> Anam dayeb amu aria ig ham bupuaḱ danab daatta, Kayak nai amu mehuṭṭem. Aḍinu? Kayak he, Kristus eḍua hibaiṭom, nai amu ig miag atiak mehuṭṭem. Amge, genabtai Kayaknu gagatagpa mauhak danab ag eḍun ii hipaidkḱulag aria Kristus ele Kayaknu gagatagpa eḍua ii hibaiṭom. <sup>16</sup> Ao, danab mauhpig ele amu ag Kayaknu gagatagpa genab eḍun ii hipaidkḱulag amu aria ig inam ele doognig. Kristus ele Nug Kayaknu gagatagpa eḍua ii hibaiṭom. <sup>17</sup> Amu Kristus Nug Kayaknu gagatagpa eḍua ii hibaiṭom am genab dayeb amu oopa genab doyak ahilag amu ag ii ehanadma. Nug ag hipunin ahilag ii uhuḱa maṭom daṭeb. <sup>18</sup> Anam dayeb amu danab ag Kristusnu oolagpa genab doon mauhpig ele amu, ag ele padal mepig. <sup>19</sup> Ig Kristusnu oonigpa genab doota, ig Nug ameg meṭem ele amu, ig wan imupaib nuhig ehanitak aognignu daṭem dayeb amu ihinignu gadonnab. Amge anam iīṭa.

<sup>20</sup> Kristus Nug mauhom amu Kayak Nug genabnab he, Nug eḍua hibaiṭom. Nug data e bau oḍue, dig men aṭeb amubia Nug danab mauhak amu ag oolagpanu Nug tatam anuḱa eḍua hibaiṭom. <sup>21</sup> Ig danab ig mauḥtem, amunu diig am danab laa nug he, kobol amu beum. Amubia danab eḍua

hibaitaknu kobol ele amu, danab laa Nug he, kobol amu beum. <sup>22</sup> Amu inam. Adam hipunin heum amunu danab oh mauhteb. Anamib aaku Kristusnu udat okaipa amu danab oh ag bau daaglag. <sup>23</sup> Anam amge amu oh anen anen, ahilag haenpa awaknu. Tatam Kristus Nug edua hibaitom, aria dimpa Kristus Nug edua udieb, laa ag nuhigpa daateb ele amu, ag geha edun hipaidkulag. <sup>24</sup> Aria, amu dimpa Kristus Nug heeb, gabman udat, iki dayak udat amu gagatag diigdiig ele amu oh heeb, iita mepeg, Nug do madod amu Kayak, ig Mamenig, Nug epegpa meeb dayeb, haen nug aaku gogpa tekku. <sup>25</sup> Adinu? Kristus Nug keeke ohnu gumak danab dayeb, Kayak heeb, Kristus Nug nuhikud keked oh tabateb, ag nug baeg waapa wakulag. <sup>26</sup> Nug keeke laala oh amu edateb, Nug waapa daapeg amu Nug geha mauhaknu ebehi ele okula heeb, iita meku. <sup>27</sup> Kayak naipa, nai laa amunu inam daate. “Kayak Nug keeke oh Nug waapa meum daate.” Kayak nai amuam Kayak Nug keeke oh Kristus waapa meum ipunigte amge Kayak Nug nuka keeke amu oopa ii daate am ele miag atiak daate. Iita, Nug keeke laa oh Kristus waapa meum. <sup>28</sup> Aria dimpa, keeke oh Kristus waapa daapeg amu Nug, Nug am Kayak Beka, Nug nuka Nugib ha, Nug Nug Mameg Kayak, Nug keeke oh Nug Beka waapa meum ele amu, Nug Nug waapa daaku. Amupa Kayak, Nug keeke oh gumak iki anuqak daaku.

<sup>29</sup> Ig mauhaknu edut ii hipaidlom amu adinu danab laala ag danab mauhpig amu oulag layatak aoteb? Ag adi dab menana, anam heteb? <sup>30</sup> Aria danab mauhpig ag edun ii hipaidkulag dayeb amu

ig ele hanhan danab laala ag ig ehed heigkulag<sup>u</sup> heteb amu, adinu ig ug amu maotem? <sup>31</sup> O lailad, ded oh da mauhak abenpa oitem. Ig oh ihinig Nadi Jesus Kristusnu daatem amunu da ahilag<sup>u</sup> gamal genab ahate, amubia da amuam genab dootem. <sup>32</sup> Danab mauhpig ele, ag edun ii hipaidkulag dayeb amu haen da Epesus ipa daaiyi laala da Jesusnu nai mehuqtem diig amunu iupeg mauhkulnu hepig amu ug amu mawak am diig iitanab. Genab anam dayeblob amu ig, “Haen elab iita ig mauhkunig amunu ig e le ele aot latu!” dab meta doolom. <sup>33</sup> Ham bupualadmananude dab meig! Danab nau ag anam maditeb ele amu, ig ag ele oignig amu geha ag ihinig dab mak hepeg kobolieb, ag oiteb bia oignig. <sup>34</sup> Ag dab mak tutuku awona, ag hipunin baula aib hepig! Ag oolagpan laala ag Kayak ii dooteb. Da nai maditem imu, ag amunu udalag nelo am ena.

### *BEDU EDUA AHAKU AM BEDU DIIG LAA*

<sup>35</sup> Aria danab laa nug inam ana od meku. “Danab mauhpig, ag atemu edun hipaidkulag. Ag edun hipaidkulag amu ag geha bedulag atemu aoglag?” awa aku. <sup>36</sup> Na am nakok kaakate? Imu na dootem, na wit aeg keeke ebatem amu qadu beeb, aeg nug ii bedaku amu nug geha bau ii daama. <sup>37</sup> Na keeke ebtem amu, na keeke dimpa bete, gumu udug ele, keeke amu ii ebtem. Iita. Na am aegib ebtem. Wit aeg o e laa aeg keeke. <sup>38</sup> Amge Kayak, Nug dab mak nuhig dim lamita, Nug gumu udug ele medate. Nug e idu diigdiig ohnu amu anen anen gumulag udulag ele anam madate. <sup>39</sup> Ig bedunig oh am idu laipu iita. Danab

nug bedu idu laa amu dod ag bedulag idu pide laa. Amu ai ag bedulag idu laa, am kakai ag bedulag idu diig laa. <sup>40</sup> Laa ag hab atan daateb amu ag bedulag laa, wanpa daateb ele amu ag am bedulag laa, hab atannu keeke amu ag bala laa, wanpan keeke ag bala ahilag laa. <sup>41</sup> Aam nug nuhig bala laa, kalam nug nuhig bala laa, amu hodopai ag ahilag bala laa, am hodopai ag ele ahilag bala idu pide pide.

<sup>42</sup> Keeke oh anam hatom daateb amunu danab mauhpig edun hipaidkulag amu kobol anamib aaku. Bedu ig boomtem amu, nug nauhte, bedu edua hibaitaknu amu nug ii nauhte. <sup>43</sup> Bedu ig boomtem amu, nug keeke binag ele iita, bedu edua hibaitaknu amu enanagnab, binag ele. Bedu ig boomtem, nug am gagatag iita. Bedu edua hibaitaknu amu nug am gagatag. <sup>44</sup> Bedu ig boomtem, nug amu wanpanu. Bedu edua hibaitaknu amu nug amu hab atannu. Am wanpan bedu genab daate dayeb amu hab atannu bedu ele aaku genab daate. <sup>45</sup> Kayak naipa, nai amunu inam daate. “Danab dig mak heum, onig Adam amu, Kayak he, nug am bau dayom.” Amge dimpanu Adam, Nug am Oudi laa, bauklel megakunu daate. <sup>46</sup> Amge hab atannu bedu nug amu tatam ii bete. Iita, wanpanu bedu anuqte, hab atannu am dim bete. <sup>47</sup> Adam tatamnu amu Kayak Nug wan awa danab amu heum. Adam dimnu amu hab atannu udiom. <sup>48</sup> Danab oh ag am wanpanu danab daateb amu, ag oh am danab dig mak heum ele nug bia daateb. Danab ag am hab atannu danab amu ag am laa hab atannu neum bia daateb. <sup>49</sup> Ig kristen amu, ig gemu wanpan danab amubia daatem, anamib geha ig

hab atannu danab, Nug bia daagnig.

<sup>50</sup> O lailad, da ag amelagpa atem. Wanpan bedu nug Kayaknu do madodpa daakunu elele iita. Keeke bedte ele, amuam wanpan bedu, amu keeke ii bedate ele, amuam Kayaknu do madod, amu aokunu elele iita. <sup>51-52</sup> Anteg! Da nai tonak daate ag amelagpa iiku otule, miag maditem. Ig kristen oh amu ii mauhmata. Iita kristen aun aun ag gogtak haenpa biugal gayebbeb, bau daanna, ag ii mauhmana. Ag am ii mauhmana amge ig oh, mauhak am ii mauhak ele, haen amupa ig baolignig. Yo ig pahanab, paha paha amuh papad qak bia baolignig. Biugal amu gayebbeb, Kayak Nug heeb, danab mauhpig ele amu ag bedulag laa, bedulag amu ii nauhma, bedulag amu ele edun hipaidkulag. Amu ig laa, ig haen amupa bau daagnig ele amu, ig ele baolignig. <sup>53</sup> Amu inam. Ig bedunig bedate ele imu amu baolia, laa awa amu ena hanhan daaku. Ig bedunig mauhte ele imu amu baolia, laa awa, bau hanhan daaku. <sup>54</sup> Amunu ig bedunig bedate imu amu geha baolia, laa awa, ena hanhan daakunu beeb, ig bedunig imu mauhte amu geha baolia, bau hanhan daakunu beeb amu haen amupa amu Kayak naipa, nai laa daate amu meu genab beku. Nai amuam inam. “Kayak Nug he, mauhak iita meum, Kayak Nug mauhak editom. <sup>55</sup> Mauhak, na nahip gagatag amu adepa daate? Mauhak, na nahip ban aeg amu adepa daate?” <sup>56</sup> Mauhaknu ban aeg amu hipunin amu hipuninnu gagatag amu do. <sup>57</sup> Amge ig Kayak amegpa, “Ena heme,” aot akunig! Nadi ihinig, Jesus Kristus, nuhig gagatagpa, Kayak Nug gagatag amu meke, ig ban edidmut. <sup>58</sup> Anam amunu O lailad,

ag gagatag dayeg! Bitumtum amu aib gopig! Ag Nadinu udat okai heig! Adinu? Ag dooteb, ag Nadinu udat heteb amu geha hamu ii qetodma.

## 16

### *KAYAKNU DANAB AH DILAG KOLEKTA*

<sup>1</sup> Gemu am da ag men dodo qag mena, Kayaknu danab ah mataglagnu heteb amunu akulnu hetem. Da tatam Galata kristen tamaniak ib ipuanati heteb amubia ag ele anam hekulagnu atem. <sup>2</sup> Metid ohpa ag oh anen anen metid laanu dedpa men dodo aopig amu dab metanna, ag laiñ otin, laulagpa mepeg dayeb, geha dimpa da gumate gopi amu ag men dodo mataglagnu matiak henana, hik ii aqama. <sup>3</sup> Aria da dimpa ahilagpa gopi amu ag aka danab laala ag men dodo amu aon, Jerusalem gokulagnu otiadpeg amu, da Jerusalem danab ag danab ag otiadpig ele amu, ag ag doyardkulagnu da ag pas madapi, ag amu ele aon gokulag. <sup>4</sup> Aria da ele gokulnu dayeb amu ag da ele oh gokunig.

### *BAG QAK NAI*

<sup>5</sup> Dimpa da tatam Makedonia gamag okule uken amu geha ahilagpa ana tekul. Ao, da geha tatam Makedonia gamagpa oikul. <sup>6</sup> Am geha da ag ele haen nakok tutuibtai ana daagnigtai, o iita da ag ele daaput ukeb, oug haen iita meeb, dimpa am da ab laapa gokulnu hebipi amu ag da omaidna gona, ibpa uuidkulag. <sup>7</sup> Da gemu Makedonia ukena, ahilagpa tepi, haen tutuib nug idu anidkunignu ool ii daate. Iita. Nadi Nug ab amu da ag ele haen nakok elab daagnig. <sup>8</sup> Amge da Epesus

daappi uke**b**, Penitkos ded doku. <sup>9</sup> Adinu? Kayak Nug dahil ib amu matu ma babaitom daate am da udat nadi, danab ah kudum ehanadpi, kristen daaglagnu hetem. Amge keked ele kudum daateb.

<sup>10</sup> Am ge**h**a dimpa Timotius, nug Nadinu udat da hetem amubia hete ele amunu, nug ahilagpa teeb amu ag tutuku dab mepeg, nug ge**h**a oo madod ele ag oolagpa dayad! <sup>11</sup> Amunu laa nug nuhignu keeke hamu bia dab maama aib di metom. Iita. Ag hepeg, nug oopa madod dayeb**e**b aria dimpa ag nug ibpa omalpeg amu nug da gumida udiku. Da nug ameg meiyi, lailad laala oh ele daatem. <sup>12</sup> Aria ig lainig Apolos, nuhignu amu da iiku atem. Haen kudum da nug amegpa, nug ge**h**a ukebeb, lailad laala ele oh gona, ag anadkulagnu ami amge nug gemu gokunu am uua autanab awom. Dimpa nug haen anta amu aria nug ge**h**a go**k**u.

<sup>13</sup> Ag Korint danab ag ib apididna ehed go-mananu amu ag dab metan autna aona, ag ahilag oopa genab doyakpa gagatag ahan daan, ag danab genab daanna amu ag gagatag ele dayeg! <sup>14</sup> Ag keeke oh henana, ag oo mauhak doonna ag heig!

<sup>15</sup> O lailad, ag Stepanus amu nug baekudpanu ele, ag am Grik oolagpanu ag tatam kristen bena, ag aka Kayaknu danab ehanadkulagnu oolag daye, udat amu aopig amu ag dooteb. Amu da ag inam hekulagnu atem. <sup>16</sup> Ag danab anam amu dab matanna, ag adi nai maditeb ele amu ag dim lamidna, aria danab laala ag danab amu ele udat heteb amu ag ahilagnu ele anam heig! <sup>17</sup> Stepanus, Fortunatus, Akaikas ele ag gumidna udieg amu da gamal ahom. Adinu? Ag Korint am ipa ii uditeb



amge ewam imu ag udieg, ag ele oh udilob bia doye<sup>18</sup> ag da oo madod medapig. Tatam danab ewam amu ag Korint apa ag ele daanna, ag ag oo madod madapig amubia ag da oo madod medapig amunu ag danab anam amu onilag humeg!

### *GAMANATAK NAI*

<sup>19</sup> Kristen tamaniak Asia taliliakpanu amu ag, ag Korint daateb ele amu, ag humadteb. Akwila, Prisila amu kristen tamaniak a laulahpa qag meteb ele amu, ag ele ag Nadi onigpa ag humadteb. <sup>20</sup> Kristen lainkad, ipa daateb ele amu, ag oh ele ag humadteb. Ig Kayaknu danab ah ihinig kobol opia awak elepa ag anen anen ag nug humiteg! <sup>21</sup> Da Paulus, da daka da epelpa humatak nai udug imupa iiku yaatem. <sup>22</sup> Am danab laa nug Nadinu oo ii mauhte, nug padal mad! Nadi, na udie! <sup>23</sup> Nadi Jesusnu ehanitak okai hamu megte ele amu ahilagpa dayad! <sup>24</sup> Ig Kristus Jesus ele ou qeta daatem amu dahil oo mauhak ahilagpa dayad!

**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 21 Feb 2024 from source files dated 31 Aug 2023

ed374bb9-d819-53d1-a85b-f86cce3892e1